

SC. SUP. 25. PL. 3.







EPISTOLÆ

THEOLOGICO - MORALES

A D

ILLUSTRISSIMUM, ET REVERENDISSIMUM

EPISCOPUM N.N.

A D V E R S U S

Librum Inscriptum: *Dissertatio in Casus
Reservatos, Venetæ Diœceseos. Apud
Joannem Mariam Lazzaroni.*

EDITIO SECUNDA:



VENETIIS, MDCCXLIV.

Apud Simonem Occhi, sub Signo Italiæ:

SUPERIORUM PERMISSU, AC PRIVILEGIO.



E P I S T O L A ³

P R I M A.

Litteris , quas , elapso mense , ad me dedisti , Doctissime Præsul , variis distentis curis , respondere citius haud potui . Deploras in eisdem Ethices Christianæ præcepta in dies pessum ire , non tam populorum malitia , quam opinionum perversitate . Lamentaris , quod Venetiis non ita pridem opusculum paginarum aliquot in lucem erupisse intellexeris laxioris doctrinæ propositionibus refertum . Ferunt , inquis , in hocce libello doceri , venialis noxæ confinia minime transilire , qui genas Sanctimonialium vellicant , unaque mammas tangunt : qui ex consuetudine blasphemii Dei Majestatem proscindunt . Percontaris verum ne hoc habeat ? Fidem adhibere renuo , inquis , amico , qui hæc ad me scripsit , his pressus rationum momentis . Ecquæ fieri potest , ut probabilistarum aliquis tam erronea commenta evulget ? Lippis , & Tonforibus compertum est , ab integro jam sæculo , vexari Probabilistas , quod Evangelicæ Moralis leges ad animarum perniciem laxent . Decerptas ex ipsorum libris 45. opiniones scandali , audaciæque plenas , Alexander VII. 65. Innocentius XI. anathemate confixerunt . Millenas alias ex eorum pariter libris extractas in uno , alterove volumine collectas typis editas evulgarunt illorum Adversarii . Quid ad hæc Probabilistæ ?

Invisito pectore pernegant, opinioniones ejusmodi in suis reperiri libris. Clamant totis lateribus per summam injuriam easdem sibi affingi, atque calumniæ, & invidentiæ Adversarios postulant, quod detruncatas, & exquisita vafritiæ in alienum sensum detortas, publico deridendas propinaverint. Quot Apologias non ediderunt, ut malam istorum in hoc negotio fidem evincerent? Tot certaminibus experrecti, & diuturna docti experientia didicerunt illi, suos ventilari libros, ad severioris criticæ amussim exigi, & si quid erroris repertum fuerit, sibi exprobrari, in vulgus exaggerari. Cuinam ergo in mentem venire potest, ex Probabilistarum officinis quidquam rei Casuisticæ in lucem prodire, quod non sit omnibus numeris expoliturum, vel quod invidis Aristarchis illos carpendi ansam præbeat? Accedit, quod nullus eorum rei litterariæ partus domo egreditur, nisi prius ab eruditis prudentibusque Censoribus fuerit recognitum, approbatumque. Suspiciendumne, plures doctos viros laurea Theologica, & morum integritate præditos, similia laxitatis offendicula confirmasse? Nunquam induci hætenus potui, ut crederem verosimilia, nedum vera esse, quæ ad me scripsit amicus. Quare te etiam, atque etiam oro, obtestorque, ut me authenticis documentis rei hujusce certiore facias.

II. Ut votis tuis, Antistes Præstantissime, faciam satis, narrabo quod res est. Prius tamen hoc tu des mihi velim, ut in refellendis laxis opinionatio-

nationibus tecum sæpe, sæpius cum aliis collo-
quar. Indicatum itaque opusculum hætenus me
latuit. Nec ad te rescribere quidquam de illo pos-
sem, nisi duo severioris instituti Religiosi viri
opusculum istud sponte ad me, non ita pridem,
detulissent, eum in finem, ut illud refutarem.
Narrarunt quippe maximum illud parere scanda-
lum tum in Confessarios minus eruditos, tum in
Sanctimoniales ipsas, quæ quod grave reputa-
bant sacrilegium, leve esse didicere. Quare ani-
marum salutis zelo flagrantibus viri Dei instare pre-
cibus, urgere consiliis, ut confutandi libelli spem
illis facerem. Extorquere tamen promissionem
haud potuerunt, tum quod in alia incumberem
studia, tum quod nec ipse induci omnino pote-
ram, ut crederem tam erronea commenta in li-
bello obtrudi, hancque meam Religiosis viris in-
credulitatem subindicavi. Verum illi, paginis
indicatis, ad lectionem laxitatum provocarunt.
Veritate facti comperta, animus ad confutatio-
nem pendebat. Simul tamen multa retrahebant.
At ecce. Dum hæc fluctuanti animoolvebam,
Litteræ tuæ adveniunt, calcaria ad cursum mihi,
sin parato, saltem propenso adjiciunt. Quamob-
rem tot adactus stimulis confutandum libellum
operæ pretium decrevi, non tam, ut tibi pa-
ream, quod tamen non levi mihi honori verto,
quam, ut animarum saluti consulam, & scanda-
la adeo gravia submoveam. Quod antequam
præsto, facti veritatem, quam inquiris, paucis
perstringam.

III. Prodiit anno proxime elapso MDCCXLIII. *DISSERTATIO IN CASUS RESERVATOS VENETÆ DIOECESIOS AUCTORE N. N. apud Joannem Mariam Lazzaroni*. Authoris, & instituti nomina, in fronte scriptiunculæ alioquin exarata, fisco, ne mussitare quisquam auit, in homines, non in errores, me calamum acuere. Libellus hic foliorum quatuor est, duplici impressus forma, altera in 4.^o in 8.^o altera, ut facilius in vulgus deveniat, latiusque permanet. Octo Venetæ Diœcesis casus, quos *reservatos* vocant, interpretandos Author suscepit. Principio Regulas præmittit octo, ad quarum amissim revocari tractanda debeant. Post, casus ipsos exponit. Sunt hi seipsis apertissimi, & cuique Tyrunculo pervii. Interpretamenta lucis omnino nihil, tenebrarum plurimum: laxiorum vero opinionum compendium ex aliis Casuistis convasatum produnt. Quippe, quæ in his materiis cæteri Probabilistæ ineptiora commenti sunt, expiscatus est, in pauca contraxit: de suo vero adjecit, quæ nec Caramuel, nec Diana, nec Tamburinus, nec Escobarius scriptis commendare sunt ausi. Hæc de genere universo.

IV. Errores ipsi sigillatim promendi nunc sunt. Levioribus prætermisiss, graviores tantum excutiam. Inirium ab octavi casus expositione ducam. Casus reservatus ejusmodi est.

C A S U S O C T A V U S

Qualibet impudicitia cum Monialibus peracta, vel quocumque modo attentata.

Quid in hocce casu interpretatione dignum? Plura reponit *Interpres*. Primum admonitum te velim, inquit, in hoc casu comprehendi etiam pollutionem, immo & fornicationem. En illius verba pag. 22. *Cave tamen putes, casu hoc non comprehendi etiam luxuriam consummatam cum Monialibus peractam, vel quocumque modo attentatam, E. G. fornicationem, vel pollutionem.* Acutissime. Præmonitum plusquam necessarium hac tempestate, qua homines probabilisticis distinctionibus plenissimi, forte potuissent hoc pacto ratiocinari. Casus reservati sunt odiosi. Restrungunt enim humanæ libertatis jura. Ergo stricte interpretandi. Ergo ad litteram. Porro fornicatio non est impudicitia: ergo fornicatio non est reservata. Pollutio etiam peior est simplici impudicitia: ergo, spectato litteræ sensu, non comprehenditur in casu. Nec enim semper evenit, ut qui prohibet minus, prohibeat majus. Hæc fieri ratioecinia *Interpres* timuit. Ille enim, qui in Palæstra Probabilistica diu stipendia meruit, experientia didicit similia disputari. Ideo ut expertus Magister clamat: *Cave ne putes, casu hoc non comprehendi etiam luxuriam consummatam.*

V. In Secundo, præmonito duo gravissima puncta versat. Alterum nomen spectat Monialium. Aliæ inquit *Sorores*: aliæ non *Sorores* vocantur. Distinctio apprimè animadvertenda. Quia etiam ex Claustralibus viris, alii *Fratres*, alii nolunt prorsus *Fratres* vocari. Casus noster Moniales *Sorores*, & Moniales non *Sorores* concludit. Hæc sunt illius verba *cit. pag.22. Porro nomine Monialium hic intelliguntur Religiosæ, quæ Sorores vocantur æque ut quæ Sorores non vocantur*. Alterum, quod tota mentis indagine, & pluribus adhibitis distinctionibus exponere aggreditur, est numerus pluralis, *Moniales*. Sero quæso Lector animo adsis, intentasque aures arrige; quia res abstrusa, atque implexa dispi-cienda venit. Casus reservatus utitur numero plurali *cum Monialibus*. Non te fugit, quam acriter disputent nostri docti Juniores, utrum numerus pluralis intelligi debeat *distributive*, vel *disjunctive*, & non *collective*, vel *copulative*. Quo constituto, an non suboles erroneæ intelligentiæ periculum? Quodnam? Stupidus ne tu? Quod nempe, ut casus sit reservatus, impudicitia debeat esse non *disjunctive*, vel *distributive* cum hac, vel illa; sed *collective*, & *copulative* cum omnibus Monialibus. Quare ne tantus subrepat error, admonendi Confessarii sunt, casum comprehendere impudicitiam peractam cum una sola Moniali. Recitemus verba ex *cit. pag.22. Neque dubites, quin, etsi dicitur cum Monialibus plurali numero, reservetur impudicitia ejusque*

que attentatio etiam cum unica Moniali: Illud cum Monialibus distributive, vel disjunctive, & NON collective, vel copulative sumendo coherenter ad id quod casu 1. quæst. 6. de Blasphemiis in Sanctos docuimus. Quis inficias iverit, monitum istud acuminis, exquisitæque prudentiæ plenum esse? Sunt enim plures adeo obtusi, ut audientes To cum Monialibus colligant, ad impudicitiam reservatam necessum esse, ut illa attentetur cum omnibus Monialibus collective, & copulative, nec satis esse hanc impudicitiam peragi, vel attentari cum hac, aut illa Moniali distributive, & divisve.

VI. His delibatis ad id, quod caput est, Interpretes accedit. Rem inauditam, a nemine Casuistarum hætenus excogitatam proponit, tanquam veritatem extra disputationis aleam constitutam. Nolo meis verbis illam exponere, ne, aut exaggeratoris, aut malæ fidei notam subeam. Verba igitur Interpretis transcribamus *ex cit. pag. 22. col. 2.*

Queritur tertio, an reservatione afficiatur qui cum Moniali peragat, vel attentet actus SUB-IMPUDICOS, DE SE veniales, V. G. genas VELLICARE, MAMILLAS tangere, & solum ex pravo affectu, vel ex prava intentione mortales. R. Negative. Nam juxta nostram Regulam octavam, nonnisi peccata per externam malitiam mortalia reservantur.

Adeo bituminosa doctrina est, ut ignorem de-
testari ne illam debeam, an confutare. Vereor
enim,

enim, ne lutum versando, & scribentis, & legentium animi inquinentur. Ut id vitarem, stylo modo hirsuto, modo salibus adversus putorem asperso, utendum censeo. Ad rem. De reservatione criminum venialium quæstio nulla. Confessariis omnibus exploratum est, sola mortalia reservari. Quid ergo veritatem obviam manifestamque in disputationem vocavit? Ignoro & ego, si Interpretis animum considero, quem piū, rectum, sanctumque habeo. Cæterum, si illius scriptiuncula spectetur, eo pertinere illam apparet, ut Reipublicæ Christianæ hanc patefaceret novitatem, videlicet: posse quemlibet citra mortalem culpam exercere actus *sub-impudicos* cum Virginibus Deo desponsatis, V. G. vellicare genas, & tangere mammas, dummodo pravus absit affectus.

VII. Actus ergo exercendi, non *pudici* sunt, sed *impudici*. Hui tam cito imposturam! Non dixi *impudicos*, sed *sub-impudicos*. Egregie. At præpositio *sub* non mutat, sed temperat dumtaxat vocis significationem, omnium latinæ linguæ interpretum consensu. *Subamarus* aliquantum, *amarus*, vulgo *amaretto*. *Suboscureus* aliquantum *obscureus*. *Subimpudicus*, aliquantum *impudicus*, vulgo *impudichetto*. *Sublibidinosus* aliquantum *libidinosus*, vulgo *libidinofetto*. Nemo Casuistarum, vel laxissimus, hactenus distinxit inter actus pudicos, & impudicos tertium genus ab utroque distinctum, quod vocetur *subimpudicum*. Falleris, inquit *Interpres*, & ut video admo-

modum parum versatus es in nostrorum lectione Theologorum. Tamburinum Probabilisticæ scientiæ lumen primum consule *lib. 7. cap. 8.* Ut Casuisticæ subtilitatis in re venerea principia ostendam, quasi a semita in diverticulum paululum declinare cogor. Gravaberis fortasse, quod antequam causam ipsam ingredior, plus justo te in vestibulo detineam. Verum in decursu deprehendes, omnia, quæ dicturus in antecessum sum, eo tandem recidere, ut in pleno lumine disputationem collocent. Distinguit ergo celebris inter Probabilistas Doctor Tamburinus *loc. cit. num. 2.* Tria delectationum genera. Unam naturalem, alteram libidinosam, tertiam *non libidinosam.* „ Tanquam „ (inquit) fundamentum pernecessarium eorum, „ quæ hic proferenda sunt, præmitto in prædi- „ ctis, V. G. in tactu MANUS mulieris, tria „ genera delectationum inveniri. Primam natu- „ ralem. Secundam libidinosam, quam vene- „ ream appellamus. *Tertiam NON libidino- „ sam.*

VIII. Istius tertiæ delectationis qualitas, ut percipiatur, duæ priores explicandæ sunt. Primam exponit Tamburinus his verbis *loc. cit.* „ Na- „ turalem delectationem voco eam, quæ oritur „ ex naturalium qualitatum proportionē. Sic de- „ lectatur manus tangere mollia, refugit aspe- „ ra . . . Si quis ergo tangit manum mulieris, & „ sine ulteriore intentione delectetur de sola mol- „ litie, de solo calore, de solo frigore &c. ex „ se nullius erit peccati reus. „ Huc revocat de-
le-

lectationem, *quam vocat Moralem*, quæ potius voluptas mentis est, quam sensilis appetitionis affectio. Talis est casta delectatio, quam quis sumit ex osculo more Patriæ, vel honesto tactu manus. Verba Tamburini rem in medio constituent., Huc reduco Moralem, sic juvat appellare delectationem, quæ interdum ex his capitatur, quæque potius voluptas mentis est, & gaudium, quam affectio appetitus sensitivi. Talis est casta delectatio, quam quis sumit ex osculo more Patriæ, vel honesto tactu manus, quando exhibetur causa castæ amicitiae. Tunc enim amicus, seu amici pars superior sibi complaceat de morali, honestaque amicitia, nihil de sensitiva delectatione cogitans., Num vaporem aliquem Molinismi luti hæc doctrina crepet, cæteri judicent. Illud nobis lepidum festivumque apparet, quod in mulieris suavio animus morali delectatione fruatur, nihil de sensitiva delectatione cogitans. Perspicuam vellem perhiberi istius *Moralis* (*sic juvat*, inquit Tamburinus *eam appellare*) *delectationis* notionem. Clariorem ea, quam Tamburinus exhibet, nemo porrigere valet, cum ipse solus hanc moralem delectationem in gaudio partis superioris sitam excogitaverit. Si plene distinctionem hanc non assequeris, saltem admirare acumen, studium, zelum perdocti Probabilistæ in lenociniis, & blanditiis excogitandis, quibus ardor concupiscentis animi mitigetur citra culpam. Secundam delectationem his verbis declarat ibidem n. 4., *Libidinosa, vel venerea est,*
quæ

quæ oritur ex copula, pollutione, distillatione, vel cogitatione ipsarum. De hac nulla difficultas, nimis quippe crassa, & sensibus subjecta est, quam ut explicatione egeat. Tertia est, quæ in admiratione homines defixos tenet. Existimabam Scholasticos tantum in discrimen vocare hoc principium, *Quodlibet est, vel non est*, mediam interferendo distinctionem ex natura rei. At metaphysicas præcisiones in sensuum oblectamenta inventas audio. Sicut enim *quodlibet est, vel non est*: similiter quælibet delectatio tactus fœminæ manus, *aut est, aut non est libidinosa*. Falleris, reponit Tamburinus, atque Summulisticarum Regularum te ignarum prodis. Tò *Non* si antecedit verbum *est*, negantis vim habet: si subsequitur, a libidine abstrahit. Papæ? Etiamne in carnalibus illecebris similium distinctiuncularum usus? Sed quid tempus terimus? Tamburinum ipsum audiamus, hanc suam tertiam *non libidinosa* delectationem mediam inter utrasque, libidinosa, & naturalem, seu sensitivam exponentem *loc. cit. num. 5.*, Non
 „ libidinosa est illa delectatio, quæ sumitur ab
 „ aliquibus actionibus, quæ licet ordinatæ sint
 „ aliquando ad generationem, aliquando tamen
 „ non sunt: & tamen ut non ordinatæ suam pariunt propriam delectationem; qua ratione
 „ possent dici remote, non vero proxime ad generationem ordinari. V. G. tactum fœminæ
 „ manus, certum est, posse referri ad se præparandum ad copulam: at potest non referri, &
 „ nihilominus tunc ille tactus pariet ex se in tan-
 „ gen-

„ gente suam delectationem , *non quidem illam*
 „ *solam naturalem ex proportionem qualitatum, de*
 „ *qua num. 3.* sed aliam propriam individualement
 „ talis tactus , ut relati ad mulierem sine ulla
 „ prorsus intentione libidinis . Sicut enim differt
 „ individualiter licita delectatio , quam a visione,
 „ & odore *purpureæ rosæ* sentis , ab ea quam sen-
 „ tis *ab albo lilio* ; sic differt delectatio pudica ,
 „ quam capis a mera proportionata pulcritudine
 „ vultus mulieris , ab ea quam caste item sumis a
 „ quacumque alia pulcritudine V. G. floridi cam-
 „ pi *Quare hæc non libidinosa delectatio, li-*
 „ *cet inter naturales computari possit* , tamen cla-
 „ ritatis gratia est omnino distinguenda : nam de
 „ hac maxime quæritur , an , & quomodo pec-
 „ catum sit , eam voluntarie suscipere . „ Revol-
 „ vito Augustini , Chrysostomi , Basilii , doctiorum-
 „ que omnium Patrum opera , ne dicam Anacreontis ,
 „ Plauti , Nasonis , & nihil adeo acutum , subtile , ex-
 „ quisitumque offendes . Philosophi axioma habent,
 „ quo asseritur supremum infimi tangere infimum su-
 „ premi . Tamburinus in sua speculatione altius in-
 „ genii alas explicuit ; inter ipsa extrema , media ,
 „ quæ alios latuere , adinvenit . Actus , inquit , ut
 „ aspectus , locutio , tactus , osculum manus mu-
 „ lieris , aliquando ordinantur ad generationem ,
 „ aliquando secus ; & dum non ordinantur ad ge-
 „ nerationem , suam pariunt delectationem non na-
 „ turalem , & sensitivam tantum , sed paullulum sapi-
 „ diorem , quæ tamen libidinosa non est , sed est non
 „ libidinosa . Ille actus , inquit Tamburinus , *pariet*
 „ in

*in tangente suam delectationem; non quidem illam solam naturalem ex proportionem qualitatum, sed aliam propriam, individualement. Quid, quæso te, est hæc individualitas? Hic vertitur difficultatis cardo. Respondet, hanc individualitatem sitam esse in relatione ad mulierem. Distingue delectationem captam ex tactu manus mollis mulieris *specificative*, & ex tactu mulieris *reduplicative* ut mulieris. Hæc *relatio* ad mulierem, ut mulierem, parit, inquit ille, suam individualement delectationem. Nonne differt delectatio, quam percipis ex odore purpureæ rosæ, a delectatione, quam captas ex albo lilio? Adhuc subobscura, & implicata videntur hæc omnia. Si subtilia nimis tibi sunt, & acuta, usus & praxis te plura docebunt. A qua tamen & praxi, & doctrina Tamburiniana Deus te custodiat. Tandem, paucis interjectis, concludit, hanc delectationem non libidinosam esse peccatum veniale. *Omnes actus* (inquit) *tactus, aspectus, allocutio mulieris...* si pariant illam delectationem non libidinosam: eaque delectatio assumatur quidem, sed non ad ullam libidinem veneream, solum cum peccato veniali assumetur. Plurima alia ibidem habet Tamburinus. Ob inventionem mirificæ distinctionis sibi magnopere plaudat. Dolet P. Sanchez hanc ignorasse distinctionem, & confudisse delectationem non libidinosam cum naturali. Adversus tamen hanc eidem subolevisse. Ah! Si viveret, inquit, P. Sanchez de mea interpretatione festive gauderet. Hæc quippe admissa, opus minime*

nime fuisset illa retractatione, qua in *Sum. lib. 5. c. 6. num. 12.* declaravit, nullam dari materiæ parvitatem in libidine. *Mea interpretatio . . . si viveret Sanchez, ei non displiceret. Non nemo suspicatur eam retractationem non esse Authoris, sed supposititiam, vel certe illi involuntariam. Ego huic suspicioni, si vera est, addo, satis fuisse Authoris mentem declarare, ut ego conatus sum, quam illum pronunciare sua dicta retractasse. Retractavit plurima a se scripta Augustinus, quin sibi dedecori verterit. At similis retractatio tenebras offunderet splendori P. Sanchez, qui in re uxoria illustranda cæteris palmam præripuit. Hac eadem distinctione interpretatur Tamburinus Decretum Sapientissimi Patri Claudii Aquavivæ Præpositi Generalis Inclytæ Societatis Jesu prohibentis docere, dari materiæ exiguitatem in venerea lue. Decretum istud, inquit Tamburinus, illis faceffit negotium, qui meam ignorant distinctionem: quoniam confundunt luxuriam cum re venerea. Etiam ne inter luxuriam, & rem veneream distinctio aliqua? Scilicet. Hoc discrimen ignorarunt prisce Patres, veteresque Theologi. Sed docti juniores, qui rem Casuisticam ad perfectionis metam perduxerunt, scite hæc duo distinguunt. Hæ sunt rancidulæ & consuetæ imposturæ Rigoristarum adversus doctos benignæ doctrinæ Theologos. Ita ne verò? Audi Tamburinum *loc. cit. num. 9.* Scio prisce Autores confundere luxuriam cum re venerea. Sed Nos Recentiores claritatis, & do-*

Etri-

Et *gratia* modo dicto distinguimus. Audistin? Nos Recentiores ea perfusi luce, eaque præditi doctrina, quæ caruerunt prisci Authores, *claritatis*, & *doctrinae gratia* distinguimus. Tamburinus, ut est acutus, & si methodum, scribendique rationem spectes, nemini Casuistarum juniorum secundus, purpureis rosis, albis liliis, floridis campis suam asperfit orationem, atque distinctiuncularum calamistris luxuriæ putorem a pice venerea sejungere tentavit primus.

VIII. Quorsum digressio adeo prolixa? Ut colligeres primum, quantum adlaborarint, quantum sudorem effuderint Recentiores, quo faverent hominibus nedum avaritiæ, sed etiam luxuriæ ardore perustis: quo viam hætenus incognitam patefacerent delibandi concupiscentiæ sapores absque culpa mortali, & cum sola culpa veniali. Deinceps ut originem casuisticæ laxitatis obiter indigitarem. Siquidem tria delectationum genera, quæ latuerunt priscos Authores, quæque longo studio adinvenit Tamburinus, fuerunt *Nostro Casuum Interpreti* errandi occasio. Intelligere haud quivit ille, quæ fieri possit, ut rei carnali, & magnopere materiatae applicari possit metaphysica Scotica distinctio media. Secum quippe ratiocinabatur. Quid amabo est delectatio *hæc non libidinosa*? Naturalis sensitiva? Minime. Libidinosa? Neque. Quid ergo? Non libidinosa. Sed *non libidinosa* mera negatio est, quæ nihil bonis auribus prodit. Hoc devicto ratiocinio, & Tamburini destitutus acumine, aper-

te lapsus in errorem est. Tamburinus quippe declaravit, delectationem *non libidinosam* revocandam ad naturalem esse; sed charitatis gratia membrum istud, a Priscis Theologis ignoratum, excogitavit. Interpretæ autem Otto *Casaum* hac vice supra Magistrum vexillum erigere voluit. Nihil futilius is iudicavit quam *per negativam participatam* **NON** carnalium sensuum oblectamenta explicare. *Æstuantem* concupiscentiæ sitim per non potum mitigabis, aut restingues? *Positivæ delectationis* visum propinandum est. At vinum istud prostitutionis erit. Verum habet, nisi antidoto temperetari. Locob igitur particulæ *Non* collocetur **SUB**, & negotium concupiscentiæ confectum est. Tamburinus concedit delectationem *non libidinosam*; ego autem impertior humanæ infirmitati delectationem *sublibidinosam*; seu *subimpudicam*. Inter delectationem enim pudicam, & impudicam excogitavi clarius præ Tamburino tertiam *subimpudicam*. Quæ distinctio sane nova cæteris quoque accommodari vitiis poterit: *Subsuperbia*, *subarsua*, *subfœtium*, *subsimonia*, & sic de singulis. Obiter postulo, ut explicetur S. Pauli Apostoli textus inquentis ad Galat. 5. *Manifesta sunt autem opera carnis, quæ sunt fornicatio, immunditia, impudicitia &c. . . qui talia agunt, Regnum Dei non possidebunt.* Impudici ergo, Paulo Iudice, ad infernum descendunt. Et *sub-impudici* quo ibunt? Ad Tartara? Obstat præpositio **SUB**. In Cælum? Impedit *impudicitia*. Quo ergo? In *sub-Gebennam*.

IX. Indicata laxitatis scaturigine, erroneæ doctrinæ scandalum auferendum. Sub oculos itaque recurrant Interpretis Casuum verba. *An reservatione afficiatur, qui cum Moniali peragat, vel attentet actus sub - impudicos de se veniales, V.G. genas vellicare, mamillas tangere, & solum ex pravo affectu, vel ex prava intentione, mortales.* Actio ergo est impudica, sed temperata præpositione *sub*. Verum, de voce missa lite, actum remque ipsam discutiamus. Deliberatus tactus mamillarum mulieris ex genere suo peccatum mortale est. Quam rationem prodis, ut hoc evincas? Sensum communem omnium Christianorum: insitum a natura pudorem: auctoritatem Scripturarum: Patrum, & Theologorum consensum. Duo priora probatione non egeant. Quisque enim intimo sensu, quodam perfundi pudore experitur, dum vel audit similem tactionem in discrimen revocari. Ad Scripturas sanctas, quod attinet, istæ vel ipsos aspectus, & familiaria colloquia vetant. *Virginem* (inquit Ecclesiastes cap. 9.) *ne conspicias, ne forte scandalizeris in decore illius.* Propter speciem mulieris multi perierant: & ex hoc concupiscentia quasi ignis exardescit.... speciem mulieris aliena multi admirati, reprobi facti sunt. S. Paulus Apostolus 1. ad Cor. 7. *Bonum est homini mulierem non tangere.* S. Hieronymus lib. 1. contra Jovinianum hunc S. Pauli textum his verbis exponit. *Non dicit Apostolus, bonum est uxorem non habere, sed bonum est mulierem non tan-*

gere, quasi & in tactu periculum sit, quod qui illam tetigerit, non evadat: nempe quæ virorum pretiosas animas rapit, & facit adolescentium evolare corda. Alligabit quis in sinu ignem, & non comburetur? aut ambulabit super carbones ignis, & non ardebit? Quomodo igitur qui ignem tetigerit, statim aduritur: ita & viri tactus & fœmina sentit naturam suam, & diversitatem sexus intelligit. Narrant & Gentilium fabulæ Mithram, & Erichthonium vel in lapide, vel in terra de solo astu libidinis esse generatos. Unde & noster Joseph, quia tangere eum volebat Egyptia, fugit ex manibus ejus; & quasi ad morsum rabidissimæ canis, ne paulatim virus serperet, pallium quod tetigerat, abjecit.

X. Si Scripturæ sanctæ adeo severe prohibent vel ipsos frequentes aspectus, & familiaria colloquia mulierum, quo, amabo te, rigore prohibebunt genarum vellicationes, & vicinarum partium tactus? S. Apostolus Paulus, Hieronymo interprete, quemcumque fœminæ tactum vetat, ut periculi plenum, quanto non damnabit rigore fœminei pectoris tactionem? Sed quod ad rem nostram propius accedit, est, quod Divinæ Scripturæ gravissime jubent, ut mulieres ubera abscondita deferant. Isajas cap. 3. inquit: *Eris pro crispante crine calvitium, pro fascia pectorali cilicium*. Item Jeremias cap. 2. *Numquid obliviscetur Virgo ornamenti sui, aut sponsa fasciæ pectoralis suæ?* Fascia hæc strophium etiam vocabatur, ut advertit Nonnius. Ejusdem usus erat,

erat, Hieronymo teste, ut nuda pectoris verecunde tegerentur, & ne papillæ nimis turgerent. *Hinc* (inquit P. Albertus de Albertis in Paradox. Moral. disp. 3. cap. 1. §. 1. *sine fascia, aut zona mulier pro impudica, vel certe non Virgine habetur; quod nullum certius argumentum impuditiæ sit in sæmina, quam impudentia. Impudentia autem nulla major in illa, quam mamillas exertas ostendere.*

XI. Patres omnes pectoris muliebris nuditatem tanquam impuditiæ argumentum execrantur. Tertullianus non modo hanc sæminarum impudentiam diris devovet; sed morem, & consuetudinem, quam in tantæ corruptelæ patrociniū jactant Recentiores, omni argumentorum genere convellit, exploditque. *lib. de veland. Virg. cap. 16. Consistit defensio nostra opinionis secundum scripturam (audiant Casuistæ) secundum naturam, secundum disciplinam. Scriptura legem condit, natura contestatur disciplinam. Cui ex his consuetudo opinionis prodest, vel qui diversæ sententiæ color est? Dei est scriptura, Dei est natura, Dei est disciplina. Quidquid contrarium est istis, Dei non est. Si scriptura incerta est, natura manifesta est, & de ejus testimonio scriptura incerta non potest esse. Si de natura dubitatur, disciplina quid magis Deo ratum sit, ostendit. Nihil est illi carius humilitate, nihil acceptius modestia. oro te sive mater, sive soror, sive filia virgō, vela caput. Si mater propter filios, si soror propter fratres, si filia*



propter patres . Omnes in te atates periclitantur sed & vos admonemus alterius pudicitia mulieres , quæ in nuptias incidistis , ne sic a disciplina velaminis exolescatis , ne quidem in momento boræ , ut quia rejicere illam non potestis , alio modo destruatis , neque tectæ , neque nuda incedentes . Mitris enim & lanis quædam non velant caput , sed colligant a fronte quidem protectæ , qua proprie autem caput est , nuda . Aliæ modice linteolis , credo ne caput premant ; nec ad aures usque demissis crebro tenus operiuntur Sciant quia totum caput mulier est , Limites , & fines ejus eousque porriguntur , unde incipit vestis . Quantum resoluti crines occupare possunt , tanta est velaminis regio , & cervices quoque ambiuntur Judicabunt vos Arabiæ fœmina Ethnica , quæ non caput , sed faciem quoque ita totam tegunt , ut , uno oculo liberato , contenta sint dimidia frui luce , quam totam faciem prostituere . Plurima alia , quæ ibidem habet Tertullianus , missa facio .

XII. Clemens Alexandrinus lib. 2. Pædagog. cap. 2. Nullo modo permittendum est mulieribus , ut nudam aliquam corporis partem offerant viris , ne ambo prolabantur . S. Hieronymus Epistola ad Demetriadem . Illa tibi sit pulchra , illa amabilis , illa habenda inter socias , quæ se nescit esse pulchram , quæ negligit formæ bonum : & procedens ad publicum , non pectus , & colla denuadat , nec pallio revoluta cervicem aperit : sed quæ celat faciem , & vix uno oculo , qui via necessarius

rius est, patente ingreditur. Cyprianus, Basilii, Augustini, aliorumque Patrum testimonia fileo. Nemo illorum muliebris pectoris tactus vel meminere, quod sit actio natura sua nimium turpis. Quemcumque tactum vel manus mulieris, necessitate sublata, damnant, ut tentationis incitamentum, sicut scribit Hieronymus *Epist. de suspect. contuber.* Dabit tibi barbatulus quilibet manum, sustentabit lassam, & pressis digitis aut tentabitur, aut tentabit. Iterum acriter invehitur in scopulosam illam muliebrem nuditatem, vanitatisque illicium. Caliga quoque ambulantis nigella, ac nitens stridore ad se juvenes vocat. Papille fasciis comprimuntur, & crispanti cingulo angustius pectus arctatur. Capilli vel in frontem, vel in aures defluunt. Palliolum interdum cadit, & quasi videri noluerit, celat festina, quod volens detexerat.

XIII. Ex his Scripturarum, & Patrum testimoniis hanc conficio argumentationem. Scripturæ Divinæ, Sanctique Patres damnant in fœminis exquisitum, vanumque ornatum, qui modestiæ, & pudoris confinia transfiliat. Damnant tanquam prostitutionis fomentum colla, & pectus denu-
dare. Improbant istarum aspectum. Ergo severiori jure execrantur contactum. Respondet P. Lessius *lib. 4. cap. 4. dub. 14. n. 112.* Scripturas, & Patres detestari, ut gravis scandali plenum, ornatum illum adeo immodestum, ut si quis uteretur veste adeo tenui, vel ita conformata, ut per eam pudenda non satis tegerentur. Næ egregium

interpretamentum ! Alii Probabilistæ respondent , præfata omnia improbari a Scripturis , & Patribus ut peccata venialia , secus ut mortalia . Hoc inane commentum his verbis labefactat Dionysius Carthusianus *tom. . . . opusc. in director. vitæ Nobil. ar. 14. Sancti Patres, & gloriosi illuminatissimique Doctores contra ornatum exquisitum , curiosum , superfluumque vestitum tam rigorose non scriberent , nisi in eo mortalem culpam existere judicassent . Venialia quippe peccata talem reprehensionem, & condemnationem non promerentur ... Denique Apostolus jubet : Mulier debet habere velamen super caput suum propter Angelos, idest Sacerdotes, & Clericos, spiritualesque viros, ne cadant per eam .*

XIV. Sed missis Patribus , & Scripturis , argumentationem factam confirmare lubet auctoritate recentium Probabilistarum . Convenit penes omnes, muliebris pectoris nuditatem, si præter consuetudinem sit , peccatum lethale esse . Omnes mortalis flagitii damnant mulierem illam , quæ in Civitatem quampiam hunc abusum scandali plenum inveheret prima . Ergo potiori jure mortalis sceleris fontem declarant , qui longe gravio-rem corruptelam , qualis est fœminei pectoris tactio , introducit . Omnes ad unum fatentur, tactum potentius , efficaciusque , præ solo aspectu concupiscentiam provocare . Ergo , si fatentibus insignioribus Probabilistis omnibus , peccant mulieres , nisi consuetudo excuset , visenda efferentes ubera ; enormius peccant eadem tangenda.
præ-

præbentes. Quid ad hæc? Obtinetne consuetudo alicubi similia (pudet enim tam sæpe partes illas appellare) tangendi? Nemo id affirmabit. Ergo luculentissimum est, ipsorum Probabilistarum consensu, peccare mortaliter qui talia peragit.

XV. Hactenus argumentationibus extrinsecus arcessitis laxam refutavi opinionem. Propius nunc illam convellere juvat. Duo spectanda in quaque actione: natura, & finis. Et ad primum quod attinet, talium partium tactus natura sua magnopere delectabilis est. Concors est omnium Medicorum, & quod plus est, earundem mulierum sententia, hunc tactum vehementer libidinem accendere, tum in muliere tacta, tum in homine tangente. Intimam ex earundem partium qualitate rationem arcessitam latius exponere pudor vetat. Si finem istius actionis spectemus, evidentius malitia apparet. Partes istæ non ad tactum, sed ad lactandum infantes institutæ sunt. Neque tactus iste arbitrarius, nulla premente necessitate, dirigi in finem honestum potest. Vultus nuditas, ut mutuo dignoscantur personæ permissa est. Osculorum usus alicubi obtinet in reciprocae benevolentiae testimonium. Eodem pertinere tactus manus potest, vel ad sustinendum lassum debileque brachium. Et tamen vel ipsum manus muliebris tactum in discrimen laxiores Casuistæ revocant, docentque, hunc tactum ex sola levitate esse peccatum veniale, etiam si nulla adsit delectatio impudica, ut advertit Cardenas *tract. 5. disp. 45. cap. 3.* Tactus autem pectoris, nullus, præter vo-
lu-

luptatem impudicam, honestus finis. Quid, quod ipse Interpres fatetur tactionem ejusmodi impudicam esse; ejusque impudicitiam temperat addendo præpositionem *sub*. Ergo delectatio hunc tactum consequens est impudica. Dicat nunc nobis, unde didicerit ipse lineas designare, & fingere tactum *impudicum* inter & *pudicum*? Unde libram acceperit adeo exactam, qua delectationis istius gradus veniales, seu leves ponderare, & secernere a mortalibus valeat? Difficilior sane est lineæ istius designatio, quam linea depicta ab Apele super Prothogenis lineam. Tandem quicumque gravi mortalis culpæ periculo sese committit, lethaliter peccat. Atqui tactus ejusmodi gravissimi periculi ultra progrediendi, tam respectu personæ tangentis, quam alterius patientis tactum, plenus est. Ergo quicumque illum deliberate peragit, vel patitur, lethaliter peccat. Probo secundam propositionem. Delectatio subimpudica consequens ejusmodi tactum, natura sua lubrica abripit in gravem delectationem. Ex alia parte in hominis captantis delectationem potestate constitutum non est præfigere lineam magnitudinis, aut parvitat, ultra quam indomita concupiscentia non transiliat. Idque pluribus, si opus esset, exemplis confirmari posset. Velociter per glaciale clivum descendenti, liberum ne est, lineam designare certam, ultra quam cursus non progrediatur? Porro appetitus sensualis per lubricum clivum concupiscentiæ ita celere ad venerea percurrit, ut aliquando vel nolentem in dispendium seminis præcipitet.

Er-

Ergo, quicumque præfato tactu in tantum periculum deliberate se conjicit, peccat mortaliter.

XVI. Quid quod ipsæ mulieres hominum infirmitatis, & propensionis conscia, partes illas visendas offerunt, quod ad placendum idoneas, & ad homines demulcendos, sibi que devinciendos dignoscant, Natura superbæ sunt, & cum non habeant nec plausum litterarum, nec militarem fortitudinem, nec civilem potestatem, nec Præfecturas, aliosve gradus, unde superbire, & extento incedere collo possint, eo studia sua collineant, ut homines illiciant, irretiant, sibi que subjiciant. Porro, ut sunt in arte hominum dementandi vaferrimæ, & experientia norunt præfatam nuditatem, & eo magis tactum, vi polle-
re efficacissima ad homines emolliendos; idcirco pectora etiam frigidissimo hyeme visenda ostentant: & quamvis plures ultra progredi prorsus respuant; attamen, quia impotenti ardore deperiri cupiunt, suspici, appeti: ut huic genio li-
tent, frigoris tormenta spernunt, pudoris, verecundiæ, atque modestiæ limites infringunt, rei familiaris jacturam faciunt, latera astant, ut pectus turgeat, utque his lenociniis, & præstigiis homines excantent. Perdoctus P. Michael Elizalde, Tamburini, Terilli, aliorumque Casuistarum accerimus refutator, plura adversus hanc mulierum nuditatem scribit, quibus missis, hæc pauca transcribo, quæ licet scopum nostrum directe non attingant, tamen apprine declarant, quanto mulieres ob scandalum, quod præbent,
pe-

periculo obnoxia sint. Inquit ergo *lib. 8. p. 5. §. 9.* „Olim quidem ego cum doctissimo Quiz de „Montoja, & aliis, existimabam, plures mulie- „res, quam viros salvari, ex pari numero; „quia nec Magistratus, nec Præfecturas gerunt, „neque alia, propter quæ, multi homines pe- „reunt. At postquam illam mulierum vanitatem, „& superbiam, hominibusque placendi maxi- „mum appetitum, & inde captam gloriam con- „sideravi, plurimum dubitare cœpi: & ipsæ sæ- „pe suo luxu, vestiumque profanitate, & Ma- „ritis, & Reipublicæ exitii causa maxima esse „solent. Si igitur, ut dicebat Hieronymus, „quisquis aliquid ita facit, ut videatur ab homi- „nibus, Scriba est, & Phariseus: istæ quid erunt, „quarum hoc fere est unum negotium, ut bene „videantur, ac placeant, & quantum ipsæ pos- „sunt, opere ipso moveant, illiciant, impel- „lant, & sic triumphent? Porro si lethaliter mulieres Patrum & graviorum Theologorum consensu delinquant ubera conspicienda deferentes: eo sane gravius, certiusque peccabunt, si eadem tangenda præbeant, quo efficacius aspectu ad venerem tactus incitat. Immo, ne rem certissimam disputando dubiam efficiam; etiamsi vel ob consuetudinem, quam ego voco corruptelam, vel ob alia momenta uberum nuditas culpa careret, tamen earundem deliberata contrectatio omnium, non Patrum modo, & Theologorum, sed Probabilistarum consensu lethaliter criminosa est.

XVII. Perspicua sunt, & luculenta, quæ diximus: evidentiora vero, atque graviora, quæ nunc subjicimus. In morum controversiis non rerum natura tantum, sed omnes vel minutæ circumstantiæ, quæ illam comitantur, magnopere spectandæ. Si absolutus mammarum tactus genere suo mortalis est, quid si aliis lenociniis, & illecebrosis blanditiis sit associatus? Quis tum a gravissima malitia depurgabit? Atqui reapse noster Casuum Reservatorum *Interpres* in exemplar venialis noxæ non simplicem proponit tactum, sed aliis præviis oblectamentis, & voluptatibus aspersum, paratumque exhibet. Inquit ergo: *qui cum Moniali peragit actus subimpudicos de se veniales V. G. genas vellicare, mammillas tangere*. Singula dispiciamus. Vis illius verbi *vellicare* expendenda est. *Vellicare* hic idem valet, ac blandiri, permulcere, suaviter irritare. vulgo *pizzicare*, *accarezzare*. Quærunto Theologi, ut dictum est, num vellicare manum, pedem, aut digitos torquere mulieris, peccatum lethale sit? *Interpres* noster ultra pergit, & genas ipsas, quæ sunt & venustior, & nobilior corporis pars, vellicandas, blandiendas, permulcendas proponit. Genarum vellicationi consociat mamillarum contræctationem. Si hæc *divisive* venialia sunt, etiam *collective*, & *copulative*, ut illius tertio monito supra relato vidimus, venialia erunt.

XVIII. Sed tandem potissimam istius sententiæ particulam expendamus. Ejusmodi subimpudicitia exercendane est cum meretricula, cum

uxorata? Minime. Qua cum ergo? Cum Virgini-
 bus Christo Jesu in conspectu Ecclesiæ solemn-
 ritu desponsatis, quæ, ut illibatum castitatis flo-
 rem sartum testumque custodiant, perpetuo
 se includunt carcere, & Virginalia ubera sacro
 velo abscondita, laneisque compressa, oculorum
 procacitati subducunt. Et Casuum Reservatorium
Interpres docere libro typis edito non erubescit,
 absque lethali flagitio licere Christianis istarum
 Virginum genas vellicare: simulque discerpto,
 seu contempto hoc velo, sacrilegas protendere
 manus ad earundem ubera tangenda? Quis hæc
 audit, & non perhorrescit? Quid, si Judices at-
 que Custodes Virginum Vestalium, quarum aut
 alloquium, aut familiarem aspectum severo ple-
 rebant supplicio, tam propudiosa de consecra-
 tis vero Deo Virginibus commenta audirent? Va-
 leant nunc Caramuel, Diana, Tamburinus, &
 laxioris Casuisticæ scientiæ Petroni. Cedo. Au-
 deres ne solo sermone pudoratis Virginibus nar-
 rare, quæ typis edidisti? Et quod nec loqui li-
 cet, opere complere permittis citra gravem cul-
 pam? Cedo alterum; Si sacratæ Deo Virgines
 tumentia ubera conspicienda ostentarent, a cri-
 mine ne easdem absolveres? Nam si Patres & gra-
 viores Theologi, vbi in ipsis mulierculis tantum
 scandalum damnant, ut ostendimus; non puto
 Casuistas illud licitum, & tanquam manifestum
 castitatis votæ monumentum Monialibus asse-
 re. Quod si Virgines consecratæ, ne peccent,
 oculis hominum sua ubera occultare tenentur;
 quod

quod scelus non perpetrabunt, qui in thesaurum hunc absconditum manus intrudere sacrilegas ausint? Verum loquatur Hieronymus, qui Sabinianum Diaconum Sanctimonialis Monasterii Bethleemitici procacem amatorem hoc pacto increpat: *Paveo miser, & tam mente quam corpore perhorresco ponere tibi volens ante oculos tuos opus tuum. Tu inter ostia quondam Præsepis Domini, nunc Altaris, amatorias Epistolas fulciebas, quas postea illa miserabilis, quasi flexo adoratura genu inveniret, & legeret. Et stabas deinceps in chora psallentium & impudicis nutibus loquebaris. Proh nefas! non possum ultra progredi. Prorumpunt lacrimæ, antequam verba, & indignatione pariter ac dolore in ipso meatu faucium spiritus coarctatur. Ubi mare illud eloquentiæ Tullianæ? ubi tumens fluvius Demosthenis? Nunc profecto muti essetis ambo, & vestra lingua torpesceret. Inventæ est res, quam nulla eloquentia explicare queat. Repertum est facinus, quod nec minus fingere, nec scurræ ludere, nec Attellanus possit effari. Non me fugit Sabinianum præter impudicos aspectus, quos detestatur Hieronymus, quid scelestius cum Virgine perpetrandum animo voluisse. Sed quis Virginis genas vellicabit, permulcebit, simulque ubera ejusdem tanget, & Sabinianus sacrilegus non erit? Quid, quod si res penitus spectetur, Dissertatoris nostri doctrina pejor est Sabiniani facinoræ. Aspectus, & tactus impudicos Sabinianus attentavit. At non negabat ejusmodi esse pec-*

peccata. Sensu, non mente peccavit. Si declamat Hieronymus adversus reum peccata confitentem, quæ non detonaret, si nostro viveret sæculo, adversus Casuum Reservatorum *Interpretem*, qui subimpudicos uberum sacratæ Virginis tactus a crimine purgat, versuta unaque crassa additione unius præpositionis *SUB*? Impudicas dixerunt mamillarum contrectationes Prisci Patres. Nos Recentiores, inquit *Casuum Interpreter*, sub-impudicas illas appellamus. Idcirco a mortali culpa innoxias asserimus.

XIX. Dolebit fortasse Casuum Dissertatori, quod declamatorio stylo causam agam. Sed injuria. Doctrinam ille vulgavit non disputandam, sed damnandam, execrandamque. Stylo ne æquabili, & blando veneris lutum versabimur? Tamen si velit, ut pressius, & paucioribus rem perstringam, votis illius fiet satis, evincamque laxissimam opinionem prædamnatam ab Ecclesia esse. Ubinam? In sequenti propositione, quam anathemate confixit Alex. VII. estque in ordine 40. *Est probabilis opinio, quæ dicit esse tantum veniale osculum habitum ob delectationem carnalem, & sensualem, quæ ex osculo oritur, secluso periculo consensu alterius, & pollutionis.* Animadvertas velim in hac proscripta propositione, ideo addita esse hæc verba *ob delectationem carnalem*, quia oscula præberi possunt, & sæpe præbentur in mutue benevolentie argumentum, & alicubi vim obtinent innoxie consuetudinis Patriæ. Contra muliebrium mamillarum contrectatio genere suo
car-

carnalis est. Nullum præter carnalem finem spectat. Dicentne eruditi Juniores, alicubi tactum mammarum in more casto positum esse? Negabunt ne oscula valde eminus natura sua, quam mamillarum tactus venerem commovere? Accedit, quod delectatio carnalis & sensualis propositionis damnata, licet juxta communem sensum pro libidinosa accipiatur; tamen cavillari quis posset, delectationem carnalem ob naturalem carnis, & sensualem ob sensus contactum nuncupari: Ergo delectatio *impudica* clarius libidinis malitiam prodit. Particula *sub* minuit, at non extrahit ab impudicitiae genere, *delectationem impudicam*. Si præpositio *sub* tanta vi polleret, ut contrectationem mammarum a gravi flagitio defæcaret, omnes impudicitiae cum Virgine peractae excusari a gravi culpa possent præter fornicationem, & pollutionem, dummodo absit prava affectio. Damnavit Ecclesia *Probabilisticam opinionem* excusantem a mortali crimine delectationem carnalem osculo perceptam, etiam secluso periculo ulterioris consensus. Ergo præjudicavit, prædamnavitque laxiorem *Dissertatoris* opinionem excusantem a lethali scelere delectationem captatam ex vellicatione genarum & simultaneo mamillarum tactu. Delectatio propugnata ab *Interprete* sacrilega est, quia cum persona sacra peracta: Simplex illa ab Alexandro proscripta. Demum *Probabiliter* tantum propositio damnata a mortali culpa vindicabat carnalem osculi delectationem; *Casuum Interpreter* tanquam sententiam

tiam extra disputationis aleam constitutam vendicat delectationem mamillarem: illam in exemplum proponit culparum *de se* venialium: Qui cum Moniali attentat *actus sub-impudicos* E. G. *genas vellicare, mamillas tangere*. Clarius ergo, severiusque vi ratiocinii manifesti damnata est hæc *Casuum Dissertatoris* opinio.

XX. Quid, quod vel ipse P. Dominicus Viva damnatarum propositionum æquo benignior interpretes in proscriptæ thesibus commentariis n. 1. narrat Clementem VIII., & Paulum V. iussisse denunciandos esse Fidei Quæstoribus asserentes in osculis, & tactibus absque prava intentione ob delectationem carnalem habitis, non contineri lethale crimen. Refert ibidem, P. Thomam Sanchez retractasse suam laxam opinionem de materiæ parvitate in re venerea. Quam retractationem, aut supposititiam, aut invitam asserit Tamburinus, ut supra vidimus. Hæc sunt verba P. Viva n. 1. Sanchez *cam communissima D.D. ostendit, osculum ob delectationem carnalem habitum, nec non amplexus, & tactus esse mortalia; adeo ut Clemens VIII. & Paulus V. jasserint denunciandos esse Inquisitoribus Fidei asserentes in illis non contineri crimen lethale.*

XXI. Duo alia meditanda obiter exhibeo, ut scandalum gravissimum putridæ doctrinæ deprehendas. Primum, quod Dissertator in scriptiuncula foliorum quatuor hanc *subimpudicam* doctrinam evulgaverit. Si Casuista in aliquo Theologico cursu similia scripturiret, erraret utique: at

er-

error utpote in aliquo magno inclusus volumine, non adeo noxius populo esset. In libello autem omnibus pervio, & quasi unico oculorum ictu legendo, tantum propinare venenum, scelus videtur undequaque gravissimum. Alterum, quod delicti gravitatem auget, est, quod erroneam hanc doctrinam præter institutum intrudere voluit. Siquidem in exemplum peccatorum venialium adducere poterat aliqua verba minus cauta, aut aliquem jocosum manus tactum. Hæc ad summum, rei explicandæ causâ, producenda fuissent. Quorsum igitur in exemplum protulit venialium culparum, vellicare sacrarum Virginum genas, & tangere mamillas? Nulla istius exempli necessitas. Exempla opportuna præsto aderant. Nemo Casuistarum vel laxissimus quid simile, ut mox dicam, commentus est. Cur itaque exemplum istud in scenam? Temporum ratio, reponebat fortasse Interpretes poterit, id magnopere poscebat. Rigoristarum factio hac tempestate augetur in dies. Opiniones austerissimas evulgat in qualibet materia, præcipue usuræ, cupiditatis, & concupiscentiæ. Hæ affectiones duæ sunt, quæ maxime torquent genus humanum. Nisi usurarum rigor laxetur, & moderatæ usuræ permittantur: nisi concupiscentia vehementer pruriens, atque ardens temperetur aliquibus *subvoluptatibus*, *subimpudiciis*; impedimento sunt, quominus Christiani ad Sacramenta accedant. Et quod revera ita se res habeat; eruditissimus quidam nostrum testatur, in amplissima Europæ Civitate Christianos

in Paschate, paucis exceptis, a Sacramentis arceri. Ut igitur Sacramentorum frequentia vigeat, & Rigoristarum Schola decreseat, & quoad fieri potest, evanescat; quo illi austeriores, eo nos benigniores opiniones cudamus oportet. En tibi referatum arcanum, cur in exemplum peccatorum venialium protulerim genarum Virginum vellicationem, & mammarum contrectationem. Quid aliud respondere Interpretes queat, non video.

XXII. Illud nunc est reliquum, ut videamus, utrum Interpreti nostro faveant saltem juniores Probabilistæ? Quod antequam præsto, sciendum, *Interpretem* nostrum a viris gravibus admonitum fuisse, ut evulgatam laxissimam, & *subimpudicam* opinionem retractaret. At ille loco honestæ & christianæ Palinodiæ Apologeticam adornavit Epistolam lingua Italica scriptam ad suum amicum Theologum, cui hæc præscribit: *Mando a V. S. Reverendiss. l'occlusa lettera contenente il mio sentimento intorno al consaputo caso* (vellicare genas, tangere mamillas &c.) *acciocchè ella possa prevalersene, mostrandola a chi, e come la sua saviezza giudicherà opportuno.* Sincere perstringam omnia argumenta, quæ in suæ opinionis præsidium Interpretes allegat. Primum opponit, dissertationem suam, non a publicis modo Revisoribus, verum etiam a pluribus aliis Theologis, antequam ederetur, fuisse recognitam, probatamque. 2. Elapsum fere annum esse, a quo in lucem prodiit, hocque tempore Confessarios Sæculares,

lares, & Regulares, Parochos, aliosque altioris subfellii Ecclesiasticos viros eandem legisse, quin aliquis quidpiam mustitaverit. 3. Errori obnoxium se fatetur, at facile, subdit, non est, se reipsa in hac dissertatione errasse, quoniam 24. annorum spatio audiendis Confessionibus operam navavit sedulam, itemque annos octo e cathedra docuit Moralem Theologiam, præter privatum studium, in quod incubuit. Hæc sunt argumenta a priori, & ex intimis causæ visceribus eruta. 4. In sui patrocinium adducit Cajetanum, *Verb. impudicitia*, Navarrum in *Manual. cap. 14. n. 42.* Thomam Sanchez de *Matr. lib. 9. disp. 46.* Bonacinam de *Matr. q. 4. punct. 9. n. 11.* Fillium *tract. 30. num. 200.* Thomam Tamburinum *lib. 7. in Decal. cap. 8. §. 2.* Bassæum *Verb. Impudicitia*, Reinffestuel *Theol. Moral. tract. 9. diss. 4. q. 7. n. 73.* Hi Theologi omnes, inquit, duobus exceptis, suam sententiam extendunt ad tactum mamillarum. 5. Nec refert, quod laudati Theologi *Monialium* non meminerint, quoniam quod ubera tangenda sint Monialium, aliarumve mulierum, naturam tactus non immutat, sed dumtaxat sacrilegii speciem adjicit. 6. Interpret vocat tactus ejusmodi non impudicos, sed subimpudicos, quoniam extrinsecus impudicitiam non præferunt, ut tactus verendorum. Postremo admonet, ut serio legatur tum dissertatio, tum aliud suum itidem opusculum inscriptum *Praxis Tribunalis Pœnitentiæ*. 7. Si hæc præstiteris, concludit, maturam prudentemque sententiam

rogabis, quin notam subeas aut temeritatis, aut inhumanitatis in aliorum doctrinis improbandis.

XXIII. Examen nunc recensitæ Apologiæ instituentum. Et primum ad argumenta tum a Censorum publicorum, tum a domesticorum Theologorum recensione, & approbatione arcessita, quod reponam non habeo. Ad cæteras demonstrationes deductas ex praxi, & experimento audiendi Confessiones Fidelium *viginti quatuor* & amplius annos, & quindecim quidem in perampla Civitate, atque octo interpretandi e Cathedra Morum Theologiam, similiter nullum repono verbum. Sunt enim hæc argumenta adeo festiva, & sapida, ut lectorum quisque valet eadem degustare, & ligurare, saporisque iudicium ferre. Ad Theologorum ergo examen ego accedo. Istorum nemo unus Interpreti favet. Quid? Erroneæ causæ accedit ne etiam mala in testium allegatione fides? De interiori animo, & intentione, quam piam, rectamque habuisse Interpretem, sentire nos convenit, quæstio nulla. Sed quantum ex facto, mox demonstrando, constat, aut mala fides, aut inscitia in laudandis præfatis Theologis evidentissima est. Quod, ut evincam, singulorum verba transcribam, a primo initium ducendo.

CAJETANUS

Verbo Impudicitia .

XXIV. „ Scito, non esse simile de tactu , & vi-
 „ su . Delectari enim in visu pulchræ mulieris
 „ nullum peccatum est , nisi *ociose* , aut ad con-
 „ cupiscendum videatur . Et ratio diversitatis
 „ est , quia tactus suapte natura ordinatur ad
 „ concubitum , visus autem minime . Hinc enim
 „ fit , ut consentire in delectationem sensibilem ,
 „ *quæ est secundum tactum* , sit consentire in de-
 „ lectionem veneream . Voluntarie autem de-
 „ lectari de persona quacumque pulchra visa ;
 „ licet non sit venereum secundum genus suum ;
 „ potest tamen , & facile fieri venereum ex affe-
 „ ctu videntis illecto , & tentato . „ Nec ver-
 „ bum ullum aliud , hoc ab Interprete citato loco ,
 Cajetanus habet . Porro non modo tactus ma-
 millarum non meminit , sed principia constituit ,
 quæ evidenter erroris plenam revincunt *Interpre-*
tis opinionem . De visu , inquit Cajetanus , pul-
 chræ mulieris potest quis delectari , nisi *ociose*
 fiat , sed prout humanæ societatis conditio fert .
 Quamquam autem visus ejusmodi genere suo non
 sit venereus , cum ad distinguendas , cognoscen-
 dasque personas sit institutus : tamen facile libidi-
 nosus evadit , si ob curiositatem , & affectum in-
 tendatur . Tactus ratio omnino diversa est . De-
 lectatio sensibilis istius actus non alio tendit ,

quam in generationem; ergo mortalis. Hanc doctrinam fusius Cajetanus explicat 2. 2. qu. 154. art. 4. Nullibi vero, vel in questionem vocat, mammarum tactum esse peccatum mortale; sed ut certum habet, suaque doctrina evincit, eo quod delectatio talis tactus natura sua in generationem tendat.

MARTINUS NAVARRUS

In Manuali cap. 14. num. 42.

XXV. Pluribus in locis Doctor hic sermonem habet de tactibus mulieris. Materiam hanc fuso calamo versat *dist. 1. de pœnit. cap. si cui, & in Manual. cap. 16.* Nullibi, nisi oculi me fefellerint, tactus uberum excusatur a mortali, quin nec ejusdem meminit. Solum in *cit. Man. cap. 14.* ubi præceptum honorandi parentes exponit, præter institutum, de isto tactu loquitur. Si quidem num. 32. definitionem occasionis prodit his verbis: *Occasio faciens alterum peccare . . . definiri potest esse omnis, & sola illa, quæ est scandalum ætivum mortiferum, hoc est, quod qui eam dat, mortaliter dando peccat.* Et post prolixam istius occasionis expositionem *numer. 42.* narrat per transennam, casum ejusmodi. *Dis, multumque dubitavi, an esset talis (occasio) illa, quam quidam Sacerdos ante triginta annos mihi confessus fuit, se dedisse admovendo, jocosò honestoque amore, absque mala intentione, manus honestæ*

cujusdam mulieris pectori, & ejusdem mamillas tangendo. Cujus decisionem nunquam hactenus affirmare sum ausus: nunc autem dico, mihi videri eam non esse talem, quia nulla pars prædictæ definitionis eam comprehendit, quando tactus ille ex sua natura non tantum incitat ad peccatum mortale, nec quasi semper mortaliter peccare faciat personas, quæ sunt ejusmodi qualitatis, quando, ut dixi, jocosè fit: Quamvis si serio fieret, aliud dici deberet. Hactenus Navarrus, nec verbum aliud habet.

Quid ex his *Interpretis* nostri opinioni favet? Jocosum, & fortuitum mamillarum tactum a Sacerdote peractum Navarrus describit. De hoc jocosò tactu diu multumque dubitavit, esset ne mortalis occasio. Hocce tibi patrocinator? Addit: Cujus decisionem nunquam hactenus affirmare ausus sum. Triginta annorum spatio (sex supra 24.) aqua hæsit Navarro super hoc casu tactus jocosì, & præter intentionem. Post tam diuturnam meditationem inquit: Nunc autem dico, mihi videri eam non esse talem, quia nulla pars prædictæ definitionis eam comprehendit. Definitio, quam Navarrus cit. num. 32. est occasionis serio, & cum intentione aut principali, aut minus principali inducendi ad peccatum mortale datæ. Nulla pars, inquit Navarrus, istius definitionis convenit mamillarum tactui jocosò, & absque ea intentione peracto. Et ad hoc quod attinet, verum dicit. Est ne hic quidquam, unde præsidium arripere *Interpres* queat? Conclusio-
nem

nem Navarri repetamus. *Quando, ut dixi, jocosè fit: quamvis si serio fieret, aliud dici deberet.*

Non modo itaque Navarrus Interpreti non adhæret; sed ejusdem opinionem prorsus improbat, ejusque aut malam fidem, aut oscitantiam damnat. De casu fortuito, quem Navarrus proponit, triginta dubitavit annos; & Interpres hinc arripit regulam generalem absolutamque? Navarrus loquitur de tactu jocosè; & Interpres absolute, & indefinite quemcumque tactum comprehendit? Tandem *Interpres* noster in laxitatis complementum, a nemine excogitatum, in exemplum peccatorum venialium absolute, & indefinite, & tanquam veritatem certissimam extra disputationem constitutam, profert, *vellere genas; & tangere mamillas sacrarum Virginum.*

P. THOMAS SANCHEZ

De Matrim. lib.9. disp.46. num.10.

XXVI. „ Si amplexus, & oscula, & tactus
 „ hujusmodi non omnino turpes, & impudici,
 „ solum habeantur joco, causa vanitatis, vel
 „ levitatis, vel alia simili, absque delectatione
 „ venerea, & si inde consurgat, ea repressa, non
 „ excedunt culpam venialem, *quia censetur par-*
 „ *vitas materia Et idem dicit Navarrus*
 „ *summa latina cap.14. num.42. vers.19. de ta-*
 „ *ctu*

„ *Et mamillarum fœminæ habito a viro jocosè,*
 „ *& absque alia prava delectatione. Quia tur-*
 „ *piores tactus sunt oscula, & amplexus, ut do-*
 „ *cet Gregorius Lopez lib. 1. verbo Cansc. tit. 14.*
 „ *par. 2. Quod bene intelligit Navarrus eo c. 14.*
 „ *num. 42. versic. 19. dummodo sint tactus illi in-*
 „ *ter personas, quæ inde ad peccatum mortale*
 „ *non incitentur.* „

Tametsi P. Sanchez fibulas laxavit in hac mate-
 ria, & hoc ipso loco num. 9. docuit cum eodem
 Navarro, dari in delectatione venerea parvitatem
 materiæ, quam sententiam, aut vi, aut spon-
 te retractavit; tamen non eo laxitatis lapsus est,
 ut a peccato mortali purgaverit tactum mamil-
 larum fœminæ, nedum Virginis sacratæ. Solum-
 modo ergo sententiam Navarri exscribit de ta-
 ctu, *joci & levitatis causa peracto*: Immo ex
 Gregorio Lopez addit, dictum Navarri intelli-
 gendum esse, *dummodo sint tactus illi inter perso-*
nas, quæ inde ad peccatum mortale non inciten-
tur. Quales essent illæ, quæ, ut scribit Hiero-
 nymus *Epistol. ad Heliodorum*, *laxis uberum*
pellibus, & arata rugis fronte, antiquum refe-
rentes mamma lallare, congeminant. Sanchez
 ergo tantum exscribit opinionem Navarri, eam-
 que ex Lopez coarctat ad personas, quæ ex
 tali tactu non incitentur ad peccatum mortale.

MARTINUS BONACINA

De Matrim. quæst. 4. punct. 9. n. 11.

XXVII. „ Quæres secundo , utrum levis tactus manuum , vel pedum fœminæ , aut velli-
 „ catio , aut digitorum intorsio sit peccatum
 „ mortale . Respondet Sanchez regulariter
 „ loquendo non esse peccatum mortale . Nam
 „ hujusmodi tactus potius fiunt ex levitate , &
 „ joco , quam ex delectatione venerea . Ob id
 „ Navarrus , & Filliucius a mortali excusant vi-
 „ rum , qui fœminæ mamillas *jocose* attingit abs-
 „ que prava delectatione . „ Bonacina refert sen-
 „ tentiam Navarri , & Filliucii de tactu jocosso , ut
 „ explicatum est , & nec verbum habet , quod *In-*
terpreti nostro faveat .

P. VINCENTIUS

FILLIUCIUS

Tract. 30. num. 200.

XXVIII. „ Sicut neque Navarrus cap. 14.
 „ num. 42. damnat virum , qui fœminæ mamillas
 „ jocose absque alia prava deliberatione contin-
 „ geret . „ Exscribit Filliucius opinionem Na-
 „ varri , quæ , ut declaratum est , non favet *Inter-*
pre-

preti. Sileo, quod Filliucius, aliorum Casuistarum more, ex facti peculiaris excusatione a Navarro facta colligat regulam generalem jocosè tactum præfatum citra gravem culpam exercendi.

P. THOMAS TAMBURINUS

Lib. 7. Decalogi cap. 8. §. 2.

XXIX. „ Tangere manum, faciem, brachia, „ pedes, & ex Navarro etiam mamillas mulieris, si fiant inter solutos, de quibus hic, & in sequentibus agimus, ex joco, curiositate, levitate, nihil habent mali præter ipsum jocum. „

Tamburinus hic dumtaxat Navarri sententiam adducit: Non ergo docet ipse, tactum mamillarum, & quidem Monialium, absolute, & indefinite esse venialem culpam. Sed, ut dixi, narrat casum fortuitum tactus præteriti, quem Navarrus post diuturnam meditationem excusavit a culpa gravi. Neque ergo vel ipse Tamburinus, tametsi Probabilisticæ benignitatis præservidus defensor, & promotor, patrocinatur laxissimæ opinioni *Dissertatoris nostri*.

ELIGIUS BASSÆUS

Tom. 2. Verb. Impudicitia n. 8.

XXX. , *Navarrus* non damnavit virum , qui
 „ fœminæ mamillas *jocose* absquē alia prava de-
 „ lectione tangeret . *Contraria tamen sententia* ,
 „ quæ generaliter tactus , & oscula ob periculum
 „ peccati mortalis sub mortali censet vitandos
 „ esse , practice loquendo , *Probabilior est* . „

Bassæus *Æthices* alioquin laxioris Author refert
 sententiam Navarri excusantis tactum præteritum
 joco , & absque prava intentione habitum : & ta-
 men hujus sententiæ non subscribit , sed contrariam
 ut probabiliorē amplectitur . Quid diceret de
 tactu serio , & deliberato mamillarum *Monia-*
lis ?

ANACLETUS REIFFENSTUEL

Tract. 9. dist. 4. quæst. 7. n. 73

XXXI. „ Ex eadem causa necessitatis excusatur
 „ tactus , seu fricatio propriorum pudendorum
 „ ad sedandum pruritum in illis partibus quando
 „ que vehementius consurgente &c. „

Nec verbum de tactu mamillarum Author iste
 habet siue loco ab *Interprete* citato , siue in tota
 illa quæstione . De tactibus , & osculis , & ample-
 xibus , si fiant ex animi levitate , & joco , asserit
 per

per se loquendo venialem culpam non excedere .
De mamillarum vero tactu , & de genarum vellitione altum silentium .

XXXII. Palam huc usque feci , neminem ex laudatis Casuistis abso lute laxam *Interpretis* opinionem docere . Cæterum non propterea eos excuso , quin aperte assero & minus illos sincere *Navarri* opinionem excripisse & laxius eandem propagasse . *Navarrus* , ut demonstratum est , post triginta annorum studium factum fortuitum , & præteritum excusavit , minime regulam indefinitam constituit . Hanc Regulam statuerunt posteriores Casuistæ , & minus sincere eam Navarro affinixerunt . P. Patritius *Sporer* , qui se discipulum jactat Sanchez , Tamburini , Escobarii , quos suos vocat , præ cæteris hanc opinionem laxavit in *Theol. Sacram. par. 4. cap. 3. sect. 4. q. 1. n. 686.* ubi hæc scribit: *Unde vides, merito jam supra concessum aspectum , vel tactum partis aliquam honesta , V. G. aspicere , vel tangere faciem , manus , brachia , & secundum Navarrum etiam mamillam fœminæ obiter ex joco , levitate , & curiositate , ex se nihil habere mali , præter ipsum jocum , vel levitatem venialem .* Ex his paucis lineis collige genium istius Casuistæ . Primum , cum cæteris suis , *Navarri* doctrinam minus sincere exponit . Post , laxitatem adjcit , eamque affingit Navarro , videlicet tangere mamillam fœminæ *ex curiositate* nihil habere mali . Ubinam scripsit *Navarrus* , nihil habere mali ejusmodi tactum *ex curiositate* ? Sed missa impostura Navarro impasta , doctrinæ laxitas

xitas improbanda, detestandaque est. Nihil habet mali tactio hæc *ex curiositate*? Poterunt ergo juvenes utriusque sexus *ex curiositate* istius vanitatis montes premere, quin peccent, nisi ad summum culpam venialem? Et hic est Casuista ille, quem Confessarii aliqui ut Magistrum sequuntur, etsi passim laxiora vel defendit, vel ut Probabilista, ab aliis propugnata proponit amplectenda? Nec propterea præfati tactus lethali culpa carent, quod joco peragantur. Quid? Sacrarum ne Virginum, sive quarumcumque mulierum ubera ludi materies? Iste ne jocos certaminis campus? Quantum temporis, rogavit nasutus quidam Bibilopola, perdurare ludus iste debet? Per horam? Per quadrantem? In singulos dies? Quapropter licet indefinita *Dissertatoris* propositio exitialis sit, graviorisque scandali plena: tamen non propterea a gravi peccato, gravique censura aliorum Casuistarum immunis est opinio, qua asseritur, vel ex joco, vel ex curiositate tangi mulierum mamillas posse absque peccato mortali. Quin istorum laxa opinio, quia fuit *Dissertatori* errandi, & aliis est, eritque peccandi occasio potissimum nigro carbone notanda est. Quid si vellem isthuc transcribere, quæ de solis tactibus impudicis cæteri Casuistæ docent? Nisi legentium scandalum timerem, plura darem. Unum, aut alterum textum promam. P. Claudius La Croix in *Textu* sui Busembau *lib. 5. par. 1. num. 887. pag. 216.* inquit: „ Oscula, amplexus, compressiones manuum, & *similia* non obscœna. . . si fiant

„ ex aliqua veniali vanitate , joco, *curiositate*, le-
 „ vitate , *petulantia*, immo etiam *sensualitate*,
 „ sive affectu *sensuali*, ac naturali (dummodo
 „ non cum delectatione venerea , nec ejus causa,
 „ etsi præter intentionem suboriatur , ea repul-
 „ sa , ac tunc abstinendo) venialem culpam non
 „ excedunt . „ Oscula ergo , amplexus , com-
 „ pressiones manuum , & *similia*, affectu *sensuali* pe-
 „ racta , etsi præter intentionem suboriatur delectatio
 „ venerea , non excedunt culpam venialem ? Qui
 „ voluntarie in hanc ardentem picem , in tantum
 „ libidinis periculum se conjicit , venialiter dum-
 „ taxat peccat ? Sed transcribamus alia , quæ ibi-
 „ dem habet . „ Persona soluta permittens se tangi
 „ ab alia tactu , qui vulgo censetur pudicus , ut
 „ prehensio , contrectatio manus , amplexus , &
 „ oscula , juxta morem Patriæ , non peccat , nisi
 „ ei constet fieri pravo affectu . Huic enim coo-
 „ perari non licet . „ *Docet tamen Filliucius etiam*
 „ *tunc admitti posse (ecurr ?) ne tangens infametur.*
 „ Vin' benigniorem charitatem ? Audi quæ sequun-
 „ tur . *Admittens autem tactus impudicos , ut ma-*
 „ *millarum , & obscænarum partium , vel oscula fur-*
 „ *tiva , & morosa , vel indecentia , peccat , cur ?*
 „ *quia præsumitur affectus pravus .* Quid si benigna
 „ charitate prædita mulier nollet judicare (ne infame-
 „ tur tangens) hæc fieri pravo affectu ? Si hæc
 „ præsumptio desit , omnia casta non ne ? Hactenus
 „ *Busembau* in Textu . In addendis vero *P. La Croix*
 „ hæc scribit *num. 964.* „ Tactus super vestes ad
 „ partes verendas , tunc est mortalis , si quæra-

„ tur delectatio confurgens ex tactu mediato co-
 „ gitato . Si autem fiat ex petulantia tantum, aut
 „ *levi delectatione*, tactus vestium erit veniale
 „ tantum . Sanchez num. IX. „ Hæc expositio-
 nem non patiuntur . Nimium enim bituminosa .
 Si perconteris ab his Junioribus , ex quo Patre ,
 aut Concilio hæc didicere ? Reponunt , Patres
 Sanctos non explicare sigillatim morum quæstio-
 nes . Theologia hæc reservata Recentioribus est .
 Quid ergo mirum , si spectemus diras libidinis
 flammæ tam funestam castitatis inducere stragem !
 Bitumen enim & sulphur Casuistæ accendunt, dum
 licita esse , aut levia docent illa , unde necessario
 sequuntur incendia . Hæc obiter ad imperitorum
 admonitionem , ut ab ejusmodi Casuistarum le-
 ctione abstineant , aut saltem cautissime eosdem
 legant .

XXXIII. Ut ad Casuum *Dissertatorem* rever-
 tatur oratio , postremo loco animadvertendum
 est, admissa ejusdem laxissima & scandali plena
 sententia , vix aliquam nisi monstruosam impudi-
 citiam cum Moniali attentatam , esse reservatam .
 Siquidem illius regula octava par. 1. pag. 6. exa-
 rata, hæc est . *Peccata externa non reservantur ,*
nisi quæ sunt mortalia ex actu externo , non vero
quæ solum sunt mortalia ex actu interno , V. G. ex
affectu mortaliter malo , vel ex intentione mortali-
ter mala . Hoc posito , vellicatio genarum , com-
 pressio mamillarum , & potiori jure brachiorum ,
 manuum , pedum , natura sua non sunt , nisi ve-
 niales culpæ : Ergo quantumvis ex pravo , & li-
 bidi-

bidinofa affectu peragantur , refervatione non afficiuntur , quoniam mortalia funt ex folo actu interno , fecus ex acto externo . Sermones quoque nifi funt turpiffimi , & homine honefto indigni , juxta Cafuiftas , non funt , feclufa pravo affectu , lethales : Ergo accedente pravo affectu interno non funt refervati . Cafus itaque refervatus : *Qualibet impudicitia cum Monialibus peracta, vel quocumque modo attentata:* ad folam non nominandam verendorum contrectationem *To qualibet impudicitia* restringetur . Materiæ turpitudinis ultra argumentationem producere vetat . Satis namque fuperque demonftratum eft , Interpretis noftri opinionem erroneam effe , fcandalique plenam , atque ab ipsis laxioribus Cafuiftis improbatam .

XXXIV. En , Illuftriffime Antiftes , quam impotens fit in non paucis Cafuiftis laxandæ Christianæ Moralis cacohetes , & amplificandæ Probabilifticæ jurisdictionis libido . Compertum heinc habes , exploratumque , injufte Probabiliftas malæ fidei , & impofturæ fuos poftulare adverfarios , quod illorum laxas opiniones minus fincere repræfentent . Quæ laxitatis inaudita commenta in fpiffis , & grandioribus voluminibus evulgent illi, veluti ex ungue leonem colligere vales ex iis , quæ Differtator Cafuum Refervatorum in quatuor foliis in lucem protulit . Si poft tot diffidia , & in confpectu feveriorum Cenforum tam erronea diffeeminare commenta audent , tute judex efto , quanto ifti ardore flagent dila-

tandi viam, quam arctam Christus testatur. Plura dicenda supersunt; verum sequenti Epistola graviora, atque pejora dabo. Interim vale, meque pro tua humanitate ut soles, amare perge.

Dabam die 4. Januarii 1744.

EPISTOLA

SECUNDA.

UT oppignoratam fidem, Antistes præstantissime, commodum liberem, alteram, & ut ego quidem arbitror, laxiorem Casuum reservatorum *Interpretis* opinionem refutandam suscipio. Gravia, quæ in alijs, ad te datis, litteris scripsi, ejusque generis sunt, quæ pudorem, modestiam, aures, comminuemque sensum, nedum mentem, percellunt; tamen iis, quæ dicturus sum, comparata, levia evadunt. Unius actionis impudicitiam produnt illa: hæc quæ nunc dicere aggredior, principia, obiter liceat & pro re nata, versant quæ per universam morum Theologiam ramos suos explicant, & mortale laxitatis venenum effundunt. Animum itaque tuum firmes, zelumque comprimam velim, quo imperturbata mente, quæ revera incredibilia sunt, audire queas, atque expendere. Et ne te plus justo in limine suspensum detineam, ad rem accedo. Principio excribo casum *reservatum*, & integram ejusdem interpretationem, quam *Disfector* exhibet pag. 7.

CA.

CASUS RESERVATUS

Blasphemia in Deum, Beatissimam Virginem, & Sanctos.

INTERPRETAMENTUM Pag. 8.

II. „ **Q**Uæritur primo, an blasphemiam profe-
 „ rens ex iracundia, seu in iracun-
 „ dia, reservationem incurrat? Respondetur:
 „ hujusmodi blasphemus reservationem incurrit,
 „ si iracundia sit talis, ut, habita plena delibe-
 „ ratione, ejus blasphemia adhuc sit mortalis.
 „ nam in hac hypothesi eadem blasphemia esse ve-
 „ ra blasphemia non definit, nec aliunde est, cur
 „ reservationem declinet. Hujusmodi blasphemus
 „ reservationem non incurrit, si iracundia sit talis,
 „ ut *deficiente plenæ deliberatione* eadem blasphem-
 „ ia sit venialis. Nam juxta nostram Regulam
 „ sextam sola peccata mortalia, & non venialia
 „ reservantur. Patet idem esse pariter, si citra
 „ iracundiam defectu plenæ deliberationis bla-
 „ sphemia ad mortalem culpam non perveniat.
 „ *IDEMQUE PARITER EST SI BLASPHE-*
 „ *MIA SIT IMPERFECTE DELIBERATA*
 „ *EX PRAVA CONSUETUDINE BLA-*
 „ *SPHEMANDI.* Etenim talis blasphemia vel
 „ secundum *MULTOS DOCTORES*, utpote,
 „ non voluntaria, saltem perfecte, non est culpa
 „ saltem mortalis; vel si est culpa mortalis secun-

„ dum NON MULTOS DOCTORES , utpo-
 „ te perfecte voluntaria solum in causa , seu in
 „ dicta consuetudine , non est blasphemia formalis ,
 „ ideoque ob nostram regulam tertiam reservatio-
 „ ni non subest . „

III. Priusquam sigillatim interpretamenti istius lapsus excutere instituo , generatim pauca disse-
 ro , & totius doctrinæ picturam adumbro . Tria in hac interpretatione partim clam latitant , par-
 tim coram prodeunt : *Ignorantismus* , *Probabilismus* , *Pelagianismus* . Latitant hæc in his ver-
 bis plena deliberatione : voluntaria saltem perfecte ,
 Actualis consideratio , seu advertentia necessaria
 est (inquit Interpres) ut deliberatio plena sit , &
 perfecte voluntaria . Hac reflexione actuali subla-
 ta , e vestigio prodit *IGNORANTISMUS* ille
 omnium scelerum parens : Ex Ignorantismo Pro-
 babilismus . Opportuna est *Ignorantismi* descri-
 ptio , quam perhibet Sapiens P. Ignatius de Ca-
 margo insignis Societatis Jesu Theologus , cujus
 nonnulla principia vano irritoque conatu *P. La*
Croix refutare tentavit . Hæc vero Camargus scri-
 bit lib. 2. *Contr.* 4. n. 530. *Hic est IGNORAN-*
TISMUS (idest doctrina de ignorantia peccatis
 apud recentes Probabilistas) *Probabilismi* , nescias ,
 an Parens , an Alumnus , an Filius , an Comes ,
 an germanus Prater ? Id certum , sine illo *PRO-*
BABILISMUM vivere non posse : sed & illud
 certum praterea , per illum (Ignorantismum) fie-
 ri vulnus immedicabile , quia fit propemodum in-
 sanabile : & morbus insanabilis est incurabilis .

IV. En

IV. En paucis perstrictam totam *Probabilismi*, & *Ignorantismi* indolem. Nullum peccatum libertate sublatum, libertas nulla, mente reipsa non advertente, non considerante. Consuetudo blasphemandi tollit considerationem actualem blasphemiae; ergo aufert libertatem peccandi. Qui igitur ex consuetudine blasphematur, pejeratur, calumniatur, convitiatur, cogitat mala, appetit aliena, impudice mulieres deperit, non peccat. Hæc *Ignorantismum*, & *Probabilismum* necessario consequuntur. Doctrinam, quam in hac interpretatione *Dissertator* Casuum promittit, non excogitavit ipse, sed transcripsit ex aliis Theologis. In altera Epistola cum eo solo mihi certamen fuit: nunc cum Probabilistarum manipulo depræliandum est.

V. Age dum ergo; Sigillatim propositiones descriptæ Interpretationis dispiciamus. *Hujusmodi Blasphemia reservationem non incurrit, si iracundia sit talis, ut deficiente plena deliberatione eadem blasphemia sit venialis*. Quæ certa penes omnes sunt, præmittamus. Quod motus, qui vocantur primo primi prævenientes rationem excusent a culpa, convenit penes omnes: quare, si quis invincibiliter non adverteret, verba quæ profert, esse blasphemata, non peccaret, quia si cognosceret ejusmodi verba blasphemata esse, minime illa proferret. De his nulla quæstio cum Interprete. Quod asserit ille, est, blasphemiam ex ira prolatam non esse peccatum mortale, quando iracundia plenam deliberationem impedit. Quælibet autem ira gravis, & vehemens rationem per-

turbat . Plenam itaque deliberationem aufert . Nemo ergo gravi ira percitus , blasphemias eructando , grave scelus perpetrabit . Porro qui sunt , qui tranquillo animo , & mente scienter deliberante , divinam Majestatem blasphemias profcindant ? Si tunc solum blasphemia peccatum est , cum ira sit ita levis , ut non impediatur plenam deliberationem , vix erunt blasphemiae inter Christianos criminosa . Nam communiter homines gravi ira furentes blasphemias evomunt . Hæc gravis ira animum mentemque perturbat : actua-lem advertentiam aufert , plenamque adimit deliberationem . Hac sublata , blasphemia gravem malitiam exiit . Ergo vix erunt blasphemiae scelera Reservationi subjecta , ut clarius , evidentiusque mox patebit . Hæc autem doctrina falsa est , & communi sensui , atque omnium Sanctorum doctrinae adversatur . S. Thomas 2. 2. q. 13. a. 2. ad 3. perspicue distinguit blasphemiam ex surreptione omnino innocenterque rationem præveniente , a blasphemia ex motu iræ prolata . Aquinas, Antoninus, cæterique Theologi requirunt libertatem ad peccandum , sed vel directam in se , vel indirectam in causa . Et hac ratione quoque exposcunt considerationem non semper actua-lem , sed virtua-lem , & in causa . Qui iracundia commotus blasphematur *non excusatur a peccato mortali.* (inquit S. Thomas loc. cit.) *sicut nec ille , qui ex subito motu iræ aliquem occidit juxta se sedentem .* Paritas rem perspicue exponit . Nam sicut occisor vitam homini aufert : ita blas-

blasphemia, si sit hæreticalis, vitam Deo adimere iniquo suo affectu pertentat. S. Antoninus 2. p. tit. 7. cap. 5. §. 1. *Nec excusatur, quod ex subita ira hoc facit, velex MORE, sicut nec excusaretur ab homicidio, & consequenter a pœna mortis, si quis ex impetu ira hoc ageret.* Eadem docet tit. 8. cap. 7. Mitto aliorum Sanctorum sententias, quoniam, quæ hic indicavi, obiter dicta velim; & ut præludia ad ea, quæ statim adjiciam. Absolute enim, & separatim accepta, possent quomodo fucis, & technis involvi. Posset opponi, contingere interdum, hominis nullo modo blasphemiiis assueti ita præveniri rationem, ut omnino inconsiderate blasphemet. Sed de his primis, subitaneisque motibus nulla nobis disputatio est. Quæ sequuntur ergo meditanda propono.

I N T E R P R E S.

VI. **P** Atet idem esse pariter, si citra iracundiam defectu plenæ deliberationis blasphemia ad mortalem culpam non perveniat. Idemque pariter est SI BLASPHEMIA SIT IMPERFECTE DELIBERATA EX PRÆVA CONSUETUDINE blasphemandi. Etenim talis blasphemia vel secundum MULTOS DOCTORES, utpote non voluntaria, saltem perfectè, non est culpa, SALTEM mortalis; vel si est culpa mortalis secundum NON MULTOS DOCTORES utpote perfectè voluntaria solum in causa,

sa, seu in dicta consuetudine, non est blasphemia formalis, ideoque ob NOSTRAM Regulam tertiam reservationi non subest.

VII. Vereor, ne dum hæc transcribo, oculi me fallant. Vix enim credibile est, talia a Christiano Theologo evulgari posse. Ordine servato, singula mox patefaciam. Et, ut principio argumenta extrinsecus arcessita promam, quæ validissima cæteroquin sunt ad erroneam labefactandam opinionem, scias velim, communiter severissimas Principum pœnas in blasphemos *consuetudinarios* latas esse, & Episcopos in suis Diœcesibus plerumque reservare scelera blasphemiae ex prava *consuetudine* prolata. Illustrissimus & Reverendissimus Daniel Delphinus peramplæ, & celeberrimæ Aquilejensis Diœcesis Patriarcha, suis Antecessoribus inhærens, his verbis reservavit crimen blasphemiae: *Omnis blasphemia hæreticalis: item simplex, si publica, id est coram decem hominibus, aut ex CONSUETUDINE fuerit.* Qui casus hoc pacto explicatur in Synodo habita ab eodem Patriarcha Delphino anno MDCCXLI. *Quam consuetudinem definientes declaramus, eos in hunc casum incurrere, qui ante ultimam confessionem plus una vice, & postea oëties, se huiusmodi peccato obstrinxerint.* In Diœcesi Concordiensi hoc modo reservatum est blasphemiae crimen: *Qui nomen B. M. Virginis, aut Sanctorum, ex PRAVA CONSUETUDINE, id est per oëtio vices ab ultima Confessione blasphemaverit.* Futilia hæc, & centum alia Episcopalia decre-

creta . Nam juxta *Dissertatorem* Casuum continuata blasphemandi consuetudo secundum *MULTOS DOCTORES non est culpa saltem mortalis* ; vel si secundum *NON multis* Doctores est culpa mortalis , *non est blasphemia formalis* . Ergo concludit Doctor noster , attenta omnium Theologorum sententia , Patriarchæ , & Episcopi, blasphemandi ex consuetudine scelus reservantes , se deridendos exhibent . Nullum quippe saltem mortale crimen est mos blasphemandi . Nec Confessarii parere in hoc Episcopis suis debent . Reservent illi vera , & mortalia crimina : Perdiscant tandem , consuetudinem diuturnam prævalere contra naturam , ipsasque æternas Dei leges , nedum humanas . Valeant itaque decreta Episcopalia . Sed quid Episcopalia dico ? Valeant decreta ipsa Papalia casus reservantia . Si qui sint , quibus hæc faceßant negotium , ea continenter violare pergant , & ab iisdem consuetudinis privilegio immunes evadent .

VIII. Veniam mihi facias velim festivum opportunumque narrandi Apologum . Cujus ut percipias vim , leges tum divinas , tum humanas , in blasphemos rogatas , cursim delibem oportet . Deus *Levit. 24.* blasphemos lapidibus obrui ad mortem usque imperat : *Qui blasphemaverit nomen Domini , moriatur . Lapidibus obruet eum omnis multitudo , sive ille civis , sive peregrinus .* Jus Civile commune ultimo puniendos supplicio blasphemos decernit . Principatus quisque peculiaris in eosdem constituta supplicia habet . Alicubi

bi blasphemi plebeji primum vapulant , & post verbera candenti ferro labiis iniustis linguæ eorum præciduntur . Alibi publicæ derisioni , & infamiæ subjacent . Jus canonicum *Cap. statui-
mus de Maledictis* , eosdem septem diebus ante fores Ecclesiæ adstare , dum sacra aguntur , dieque dominico pallio posito , nudis pedibus , collario cervicibus imposito , publico aspectui sese exhibere , septemque sextis feriis priusquam Ecclesiam ingrediantur , in pane & aqua jejunare præscribit . Quæ præstare si neglexerint blasphemi , ingressu in Templum , & Ecclesiastica sepultura interdiciuntur . Concilium Lateranense *sess. 9. cap. ad abol.* Clericos semel blasphemos unius anni redditibus Beneficii privat . Post eosdem beneficio abdicat , tum ad Ecclesiasticos proventus incapaces constituit . Nobiles Laicos prima vice viginti , secunda quinquaginta ducatorum multa punnit , *Consuetudinarios* nobilitate dejectos declarat . Plebejos blasphemiiis assuetos ad Triremes carceresve damnat . Postremum idem Concilium , *loc. cit.* & Julius Papa III. in sua Constit. *In multis* , jubent , ut quicumque blasphemantem audierit , infra triduum denuntiare eundem debeat apud Judicem Ecclesiasticum , vel Sæcularem . His deliberatis .

IX. Quidam ultimæ legis exactus observator blasphematorem audiens , continuo eundem Judici defert . Captura imperata , ad carceres ducitur . Divino percitus terrore , sacrum Ministerium postulat . Conscientia crimina serio commeditans,

tans , potissimum sacrilegas atque hæreticales blasphemias : quarum multitudine , & enormitate perterrefactus , in desperationem pene agitur . Tum Confessarius : Cedo fili mi : Ut quid animo despondes ? *Advertistine* , te blasphemare , cum blasphemias has emittebas ? *Scivistine* , ejusmodi esse peccata ? Cum primum convitari Deo , ejusdemque Sanctissimæ Matri occæpi , sane aculeis torquebar , meque Deum offendere recognoscebam . At temporis decursu mente alio distenta , atque incogitante , in horrendas erumpebat lingua blasphemias , occasione data . Quid fili mi , quid ? Occasione data ? Numquid consuetudine blasphemandi irretitus es ? Heu Pater Hiscere non valeo . Ut video , nimium es meticulosus . Noli timere . Assuetus ne es blasphemis ? Scilicet domine . Et quod me conficit , tanto impetu in blasphemias ferebar , ut singulis ferme verbis , & ad cujusque Sanctorum , Virginis , & Christi Domini imaginem sacrilega , in eosdem convitia eructabam . Laus Deo , quod tandem sincere fassus sis omnia . Macte animo . Blasphemie istæ tuæ , aut nullæ , aut ad summum veniales culpæ sunt . Quoniam consuetudo hæc plenam tibi ademit deliberationem , qua sublata , necessaria ad peccandum libertas periit : aut nullam ergo , aut venialem culpam peccasti . Heu domine ? Animam mihi reddidisti . Dicas iterum , amabo te . Tam incredibiline vi consuetudo pollet , ut blasphemias ipsas malitia exuat ? Ita docet potissima *Doctorum* multitudo . Si ita res habet ,
ho-

hominum felicissimus ego : Non solum animam inferno , sed corpus ipsum suppliciis in blasphemosa Principe definitis subduxi . Haberes ne Pater librum quemquam , qui hanc propugnet doctrinam ? Bona tui sorte , Casuum Reservatorum mecum habeo libellum . Hunc accipe . Infecta confessione , libelloque in perula posito , ad Tribunal sistitur . Examen Judices instituunt , cumque interrogant , Tu ne sacrilegus ille divinæ Majestatis , Virginis Sanctissimæ , Divorumque convitiator ? Utique . Crimen ergo fateris ? Scilicet . I ergo Carnifex , reumque confessum juxta leges plecte . Indensus ne damnabor ? Si sinceram criminis confessionem excepistis , & criminis audiat defensioem , Age fare . Non ego semel , bis , terve , quaterve blasphemus fui . Quid ergo ? Ab Adolescentia blasphemandi vitium in more habui : Blasphemiis innutritus , sive solus , sive cum sociis , sive domi , sive in platea , ubique demum blasphemis , quoad potui , horrendissimis Deum , Virginem , Sanctosque proscidi . Hæc mea cum lacte hausta consuetudo . Porro Confessarius perdoctus me condocesecit , peccare utique gravissime eos , qui interdum , & raro , secus qui ex consuetudine , & maxime inveterata , blasphemant . Deliras ? Hæccine defensio tua ? Haud contentus Dei honorem conculcasse , proximum , & vel ipsum sacrum Ministrum calumniis infectari audes ? Absit a me tantum sceleris . Veritatem dico perspicuam , quam illi ipsi Confessarii me docuerunt , quibus vos Judices regi-

gimen animarum vestrarum fидitis . Quod si mihi utique indigno adhibere fidem renuitis , documenta exhibeo luculentissima . Et extractum e perula librum porrigit Judicibus , qui , re infecta , stuporeque defixi , libelli examen instituunt ; & veritate comperta , carnificem vocant , diris consecrari flammis libellum imperant : Confessarium vero ad supremum fidei Tribunal deferunt .

X. A diverticulo in semitam regredior , & ad Fidei , seu Christianæ Theologiæ principia Interpretis doctrinam exigo , quæ est ejusmodi , *Hujusmodi blasphemus reservationem non incurrit , si iracundia sit talis , ut deficiente plena deliberatione eadem blasphemia sit venialis . Nam juxta nostram Regulam sextam sola peccata mortalia , & non venialia reservantur . Patet idem esse pariter , si citra iracundiam defectu plenæ deliberationis blasphemia ad mortalem culpam non perveniat . Idem pariter est , si blasphemia sit imperfecte deliberata ex PRAVA CONSUETUDINE blasphemandi : etenim talis blasphemia vel secundum multos Doctores , utpote non voluntaria , saltem perfecte , NON EST CULPA , saltem mortalis . Vel si est culpa mortalis secundam NON multos Doctores . . . non est blasphemia formalis , ideoque ob nostram Regulam tertiam reservationi non subest .* Duæ sententiæ in hac doctrina continentur . Prima : blasphemix ex consuetudine prolatae , non sunt peccatum , saltem mortale , ideoque non reservatae . Et hæc sententia est secundum multos Doctores . Secunda : quamquam
juxta

juxta *non multos* Doctores sit peccatum mortale , tamen non est blasphemia *formalis* : idcirco non subest reservationi . Has duas sententias necessario consequitur hæc conclusio . Omnium Theologorum consensu nulla blasphemia ex consuetudine est reservata . Ergo extrema (dictum est semel , repetendumque iterum est) laborant ignorantia tot Concilia Diœcesana , tot Episcopi , & Patriarchæ , quos Deus constituit regere Ecclesiam suam , dum blasphemias ex consuetudine reservant .

XI. Prima sententia in examen veniat . Convenit penes omnes , retractata constanti pœnitentiæ proposito blasphemandi consuetudine , non peccare mortaliter eum , qui vi illius inveterati moris in aliquam , præter voluntatem , blasphemiam incidit . Nullum , ad hoc quod attinet , diffidium . Doctrina scandali plena , quæque aures Ethnicorum , Turcarumque , nedum Catholicorum , lædit , est , quod blasphemiae ex prava consuetudine non retractata prolatae , expertes culpæ sint , saltem mortiferæ . Quid virgam censoriam extendis in sententiam , quam major Doctorum pars propugnat ? Nam adversam , *non multi Doctores* defendunt . Siceine ergo tam erronea doctrina affingitur Ecclesiæ Catholicæ Doctoribus ? Quam heinc non arripient Hæretici , & Pagani calumniandi Ecclesiam Catholicam ansam ? Retractare ergo hanc imposturam Ecclesiæ Catholicæ impactam Interpreter debet . Nam omnes Doctores Ecclesiæ , omnesque veri Theologi
da-

damnant, detestantur, execranturque præfatam doctrinam, impiam in Deum & in Sanctos, & Christianorum deceptricem .

- XII. Qui sunt, qui conceptis verbis talem defendunt blasphemiam a culpa immunem? Sunt, non Doctores Ecclesiæ, sed nonnulli Probabilistæ in Ecclesia . Non negamus ergo, sed in Probabilissimi dedecus asserimus, Recentiores plures præfatam doctrinam defendere . Eorundem verba isthuc transcribere juvat, ut palam fiat, qui sint istius sententiæ Doctores .

- XIII. P. Thomas Tamburinus *lib. 2. in Decalog. cap. 6. §. 4. num. 17.* Verba contra Deum in ebrietate, vel pbranesi, vel ex inadvertentia, orta ex INVETERATA CONSUETUDINE, blasphemix nequaquam sunt: Malitia enim blasphemix, sicut & perjurii, atque hæresis, requirit procedere ab homine, qui ratione utatur . Neque enim quis contumelia rationabiliter afficitur ex convitio dicto a psyttaco . Ita Vasquez, Turrian . apud Layman, aliique . Vide quæ dixi in Opusc. Meth. Conf. lib. 2. cap. 3. n. 25. Quæ hoc citato loco scribit Tamburinus majorem adhuc horrorem præferunt: Hæc enim habet n. 23. Qui vero ex inveterata consuetudine inadvertenter jurat falsum, licet videatur obligari ad consuetudinem confitendam, tamen communiter excusatur

Num. 25. Unum nota, aliquando actus hujusmodi inadvertenter factos non retinere ne malitiam quidem materiale, seu quam vocant obje-

Etiam; & tunc nec ipse actus, nec consuetudo est peccatum, adeoque nec Confessioni subjiciendum. Talis communiter reputatur contumelia in ebrietate alicui facta ab ebrio... Eodem modo dicendum esse docent aliqui cum Joanne Sanchez in selectis fise disp. 10. n. 5. de BLASPHEMIA, hæresi; & supradicto juramento, quod scilicet essentialiter requirant esse ab ratione utentē; & consequenter ea inadvertenter facta, NEQUE IN SE, NEQUE IN CAUSA esse peccata, adeoque nec necessario confitenda.

XIV. Nemo non videt quanta dicenda occurrerent, si singulos excutere errores vellem in descripta Doctrina contentos: At hoc præter institutum esset. Ex alia parte adeo enormes sunt, ut confutatione non egeant. Blasphemix ex inveterata consuetudine non sunt Ecclesiæ clavibus subjiciendæ? Nec materialiter malæ sunt? Ergo nulla lege, nec divina, nec naturali, nec humana vetitæ. Audistis res adeo horrendas unquam? Quod subdit, necesse esse, ut perjuriam, blasphemiam, hæreses, contumeliam, perpetrentur ab homine essentialiter ratione compote, festivum est: quasi cætera peccata peccare valeant etiam amentes, & psyttaci.

XV. Doctrinam Interpretis, & Tamburini docet Leander a Sanctissimo Sacramento tract. 1. de juram. disp. 5. qu. 17. de more nova adjecta laxitate. inquit ergo: *Qui ex habitu blasphemat absque plena & sufficienti advertentia ad peccatum mortale, tunc non committit novum peccatum.*

mortale, sed solum peccavit in causa, quatenus non abstulit pravam consuetudinem, ad quam advertit. Laudat pro hac sententia Bonacinam, Filliucium, Toletum, Tamburinum aliosque. Toletus lib. 4. c. 13. conceptis verbis docet oppositum: *Qui enim ita male assuetus esset, nec vellet emendare se, peccaret TUNC mortaliter, quia esset in culpa præcedenti, quia non abstulit occasionem peccati.* Navarrus in Manuali cap. 12. n. 84. loquitur de illa inconsideratione, quæ est causa blasphemix, ita ut si adverteret homo, non blasphemaret, ut docet Cajetanus: secus de consuetudine blasphemandi non retractata. Verum citatus P. Leander a SS. Sacramento hanc interpretationem rejicit ut *Rigorismum*. Quare ut Christiani liberius, sublati scrupulis, blasphemare valeant, legas serio velim sequentem, quem proponit casum. *An saltem peccet mortaliter actu ille, qui inadvertenter, & inconsideranter blasphemat; est tamen ita habitualiter dispositus, quod etiam si adverteret, blasphemaret.*

Audi Responsum Probabilius.

Probabilius respondeo, nec illum peccare mortaliter actu in proposito casu. Nam, ut quis actu peccet, novumque peccatum committat, non sufficit, quod sit habitualiter dispositus, & proclivis ad peccandum; sed requiritur necessario quod actualiter, & in actu secundo sit. Quia Deus, inquit S. Augustinus contra Semipelag-

gianos, non imputat nobis quod faceremus, si hoc, vel illud occurreret; sed quod actu facimus. Alioquin homines dediti luxuriæ, vel avaritiæ, qui, data opportunitate, consensum præbent his peccatis, semper actualiter peccarent, quod omnino est falsum. Citat in sui favorem Suarez, Valentiam, Sanchez, Filliuc. Layman, aliosque, Valentia expresse docet oppositum. Non diffiteor tamen sententiam Tamburini, & Leandri alios quoque docere Probabilistas. Sed addimus in hac quæstione istorum auctoritatem nos rejicere. Quod de Semipelagianis obtrudit Leander, ineptum est. Nam nunc disputamus de futuris absolutis, non conditionatis, ut ex titulo quæstionis a Leandro propositæ patet. Quæritur enim de homine reapse blasphemante ex habitu, utrum peccet? Verum hæc præter institutum.

XVI. Ad *Interpretem* nunc Casuum revertamur. Ne igitur aures nobis obtundat auctoritatem obijciendo quorundam Probabilistarum; idcirco in antecessum istorum patrocinia illi concessimus. Illud tamen adverto, Interpretem Casuum laxius aliquomodo cæteris hanc suam opinionem defendere. Pressius ergo ejus veba dispiciamus: *Idem pariter est si blasphemia sit imperfecte deliberata ex prava consuetudine blasphemandi.* Consuetudo ergo blasphemandi impedit, quominus quis deliberate blasphemet? Peccatum originale abstulitne liberum arbitrium necessarium ad peccandum? Hæreticus declaratus Calvinus est, qui id asseruit. Et Casuista Catholicus do-

docet, peccatum blasphemiae, habitu voluntario roboratum, adimere libertatem necessariam, ut blasphemia sit lethaliter criminosa? Authores, quos indicavimus, non eo laxitatis lapsi sunt, ut absolute a peccato immunes ex habitu blasphemantes declarent: Sed blasphemantes ex inadvertentia orta ex consuetudine non peccare asserunt. Noster Casuum *Interpres*, ultra progressus, absolute asserit blasphemiam ex consuetudine prava prolatam, non esse reservatam: *Etenim talis blasphemia* (ex prava consuetudine) *vel secundum multos Doctores, utpote non voluntaria, saltem perfecte, non est culpa mortalis*. Hic absque tergiversatione absolute, & indefinite docet *Interpres Casuum Reservatorum*, blasphemiam ex consuetudine non esse peccatum mortale. Sive itaque blasphemus *Consuetudinarius* blasphemet cum advertentia, aut secus, mortaliter non peccat. Cedo. Consuetudo blasphemandi tollit ne potestatem advertendi, aut secus? Si primum asserat *Interpres*, hæresis notam non evadit. Si secundum: Assuetus ergo blasphemii actu advertere potest se blasphemare: & quod actu non advertat, illius culpa est. Sed blasphemans cum potestate actuali advertendi, etiam si vinculo consuetudinis astrictus sit, mortaliter peccat: Ergo errorem redolet absolute pronunciare, quod blasphemia ex perversa consuetudine non sit peccatum. Hoc ergo primum doctrinae *Interpretis* membrum non videtur a gravi censura immune.

XVII. Alterum quoque membrum : *Vel si est culpa mortalis, secundum NON multos doctores, utpote perfecte voluntaria solum in causa, seu in dicta consuetudine, non est blasphemia formalis: ideoque ob nostram Regulam tertiam reservationi non subest.* Hoc quoque membrum, inquam, obnoxium censuræ videtur. Nam primum ignorantiae, & cæcitatæ damnat, ut supradictum est, Episcopos, & Synodos Diœcesanas, quæ blasphemias ex consuetudine reservant. Deinde, futili, & perridicula ratione, a reservatione hanc blasphemiam eximit. Concedit, secundum *Non multos* Doctores eam esse peccatum mortale : *Non propterea tamen inquit Reservationi subest.* Cur ? Quia non est blasphemia *formalis*. Scitissime. Quid inde ? Quid ? Juxta nostram tertiam Regulam : casus reservati sunt odiosi : odia autem sunt restringenda : ergo stricte interpretandi. Licet igitur blasphemia sit mortifera, enormis, & sacrilega ; tamen, si non est *formalis*, non subest reservationi.

XVIII. Liceat nunc mihi his quæstiunculis veluti quibusdam aculeis Probabilistas urgere. Vera ne doctrina vestra ? Verissima, quia multorum Doctorum. Bene habet. Cur itaque charitatis, & justitiæ violatores exostulatis illos, qui ab integro, & amplius sæculo clamant, inclamantque, Probabilistas legum fræna relaxare, morum integritatem corrumpere, Sacramenta indignis ministrare ? Cur, inquam, invidentiæ, similitatis, calumniæ, & gravissimorum criminum

num fontes illos postulatis? Hæc enim in more habent: Hæc ex habitu, & consuetudine peragunt: Ergo aut nullum, aut leve crimen perpetrabunt. Et quo fuerint in detrahendo constanteriores, eo erunt a culpa innoxiores. Quod si asserant calumnias, probra, convitia hominibus ex consuetudine afficta, culpa non carere; criminisne expertes erunt blasphemix in Deum ipsum jaculatæ? Dicant insuper, utrum e suggestu deprædicarent doctrinam hanc? Edisserant, sitne alia in publico pulpito, alia in secreto Tribunali doctrina, qua reformandi sunt Christianorum mores? Doctrinam, quam pro Confessariis exhibet *Dissertator*, audivimus. Quam e publico suggestu pronunciavit pius, atque eloquentissimus P. Paulus *Segneri*, licet, ut contendunt trium super Probabilismo Epistolarum Editores, opinioni minus Probabili favens, describam. Prætextus, quos allegare Christiani solent, se ex pravo more, aut iracundiæ impetu blasphemare, sibi opponit in suo celebri opere *Cristian, Istruit. part. 1. ser. 8. §. 3. n. 17*. Forsitan quibusdam a scopo deflectere videbitur digressio isthæc: potissimum quod erit paululum prolixior. Verum cum omnia legerint, tunc deprehendent, valde veritati, quæ in manibus est, illustrandæ idoneam esse. Ad rem ergo.

XIX. „ Ma per non dare noi sì terribile la sen-
 „ senza su questi rei, senza prima udirli, ascol-
 „ tiamo qualcuna delle discolpe, che sogliono
 „ tosto addurre in proprio favore. Due sono le

„ principali . L' una è il mal costume : l' altra è
„ la collera . *Non vorrei bestemmia*re, dice colui :
„ *Ma sono avvezzo così : Non posso emendarmi* .
„ E quanto a ciò non vi voglio io già negare , che
„ se uno male abituato nel proferire contro Dio
„ parole ingiuriose adopera de' rimedj per conte-
„ nersene più che può , non sia verisimigliante ,
„ che in qualche caso la passione lo acciechi tan-
„ to , o la mala usanza tanto lo sopraffaccia , che
„ egli o non pecchi , come in atto indeliberato
„ conforme a quello , *Est qui labitur lingua sed*
„ *non ex animo* ; o pecchi sì , ma di colpa più tol-
„ lerabile . (*Quid cautius a severiore Theologo di-*
„ *ci valet?*) Ma se egli invece di odiare questo
„ mal abito , e di adoperare mezzi proprj , e
„ proporzionati per estirparlo , sempre più lo
„ rinforzi con atti , senza travagliarsene molto ;
„ dico , che il peccare per abito aggrava in costui
„ la colpa , non la diminuisce . Che bella scusa fa-
„ rebbe quella di un ladro , il quale dicesse al giu-
„ dice : Perdonatemi la forza , perchè sono av-
„ vezzo a rubare : Anzi per questo , direbbe il
„ Giudice a lui ne meriteresti più d' una , se di
„ più d' una tu mai fossi capace . Perchè come
„ avvezzo a rubare sei perturbatore più costante ,
„ e più consueto della pubblica quiete da te scon-
„ volta . In sostanza , peccar per abito è peccare
„ più intensamente , dice S. Tomaso , ed in con-
„ seguenza è peccare più gravemente ,
„ Quanto poi al bestemmiare per collera (che
„ è la scusa di tal' un altro) non ha dubbio , che
„ quel-

„ quella bestemmia , che nasce da mero orgoglio ,
 „ come proviene da maggior deliberazione , co-
 „ sì è più detestabile di quell' altra , che nasce da
 „ perturbazione prodotta dall' ira . Tuttavia ,
 „ che sciocchezza è mai questa , pretendere , che
 „ lo sdegno scusi le contumelie vomitate contra
 „ sua Divina Maestà , mentre non è bastante ad
 „ iscusare gl' improperj detti ad un uomo ancor
 „ di volgo ? Se uno per collera vi dica una solen-
 „ nissima villania , lo scusate voi senza farne risen-
 „ timento ? Anzi gli date per risposta or pugnì ,
 „ or pugnate . E poi volete che la medesima
 „ collera scusi voi nelle villanie , che da voi sono
 „ dette a Dio ? „ Eandem doctrinam omnes ad
 unum Concionatores e publico suggestu docent ,
 dum de habitu perverso , pravaque consuetudine
 ad populum loquuntur . Legantur eorum libri
 quadragesimales ,

XX. Conferantur itaque quæ hætenus ex ce-
 leberrimo P. Paulo Segneri transcripsi cum opi-
 nione *Interpretis* , *Tamburini* , *Leandri* , aliorum-
 que Probabilistarum . Tunc negent , si ausint , di-
 versam omnino esse *Pulpiti* , & *Confessionarii* do-
 ctrinam ? Alterutrum ergo fateantur oportet .
 Aut Confessarios , aut Concionatores erronea do-
 cere , & Christianos , licet non ex animo , decipe-
 re . Utri horum fides adhibenda ? Respondet sa-
 piens Jesuita P. Michael Elizalde *par. 2. lib. 6. q. 6.*
 Christum Dominum nobis perspicue indicare , qui-
 bus ex his Ministris fidem adhibere , & a quibus
 cavere debeamus . Inquit enim Christus *Matth. 23.*

Super cathedram Moysis sederunt Scribae, & Pharisei. Omnia ergo quaecumque dixerint vobis servate, & facite. Aliam Regulam prorsus oppositam nobis praescribit Matth. 16. Intuemini, & cavete a fermento Pharisaeorum, & Saducaeorum. Quod cum de panis fermento discipuli intelligerent, continuo illam exposuit Christus ibidem. Quare non intelligitis, quia non de pane dixi vobis, cavete a fermento Pharisaeorum, & Saducaeorum? Tunc intellexerunt, quia non dixerit cavendum a fermento panum, sed a doctrina Pharisaeorum, & Saducaeorum. Apertissimam inter hos duos textus oppositionem, pugnamque nemo non videt. In primo textu jubetur: Quaecumque dixerint vobis servate, & facite. In altero hoc idem conceptis verbis vetatur: Intuemini, & cavete... a doctrina Pharisaeorum, & Saducaeorum. Si cavendum ab istorum doctrina est, quo pacto illorum doctrinae parere, & quae dicunt exequi debemus? Missis variis expositionibus, interpretatio Augustini apprime congrua est. In primo textu Concionatores Christus designat, qui in Templo coram, & e cathedra, seu pulpito divina mandata exponunt: Super Cathedram Moysis sederunt Scribae, & Pharisei. Quid heinc? Omnia ergo quaecumque vobis dixerint servate, & facite. Audiamus Augustinum Ser. 137. alias de verbis Domini 49. Habes Dominum dicentem de Phariseis: Cathedram Moysis sedent. Deinceps prope finem: Fratres mei nanquid non ascendit aliquando, aut Presbyter, aut Episcopus, & non dicit

cit aliud de superiori loco, nisi ne rapiantur res alienæ, ne fraudes fiant, ne scelera admittantur? Non possunt dicere aliud qui Cathedram Moysis sedent. Et post pauca: Quia de loco superiore non possunt dicere isti, nisi bene facite: nolite perjurare (nolite blasphemare) nolite fraudare, nolite aliquem circumvenire. Quis istorum e suggestu auderet effari: vellicare Virginum genas, humeros nudatos ostendere, ubera tumentia efferre, Monialium mamillas tangere, ex consuetudine contumelias blasphemiasque in Deum evomere, aut nulla culpa est, aut venialis? Quis tantæ frontis, ut e pulpito coram populo similia effutire aufit? Et tamen in secretis consiliis, immo in libris typis editis, hæc, & pejora, ut allatis textibus palam feci, docentur. Mundi genius ad concupiscentiam carnis, & cupiditatem rerum, quod attinet, plus minusve semper idem. Testatur ipse Augustinus, suo quoque tempore ad se venisse Christianos, qui in secretis consultationibus contrariam ab ea, quam in Concionibus audierant, requirebant doctrinam. Aliquando nobis contigit (subdit ibidem) & experti dicimus: nam non crederemus. Multi a nobis consilia mala petunt: consilia mentiendi, circumveniendi, putantes quia talia placeant nobis. Sed in nomine Christi, si domino placeat quod dicimus, nullus talis nos tentavit, & invenit quod volebat in nobis. Quia si vult ipse qui nos vocavit, Pastores sumus, non Mercenarii. Nec putes Catholicos istos adeo sive stupidos, sive effrontes fuisse, ut vellent ab Augustino sibi licita red-

reddi mendacia, fraudes, dolos, furta, impudicitias, blasphemias sub his nominibus, nullisque adjectis calamistris. Petebant illi, quod petunt & nostri: videlicet, ut vocum mutatione, ac substitutione, res ipsæ concederentur. Querebant & ipsi sub honestis vocibus turpes res. Impudicitia vocetur *subimpudicitia*: mendacia *restrictiones mentales*, aut *loquutiones materiales*: furta *compensationes occultæ*: blasphemix continuatæ, *blasphemix materiales*: usuræ *societates triplicata*: Hæc ab Augustino petebant, sed hæc ab Augustino Pastore, non Mercenario, obtinere non potuerunt. Hæc petunt Christiani a duobus sæculis, & a pluribus obtinent, atque heinc ortum magna ex parte duxit Casuistica Theologia recens. Sed audiamus ipsum doctissimum Elizalde, *cit. lib. 6. q. 6. §. 4.* „ Ex hac ergo ab Augustino „ constituta regula, ea plerumque saltem bona, „ & facienda dicimus, quæ sacri Concionatores, „ Presbyteri, aut Episcopi sedentes super Cathedram Moyfi ex alto prædicant: ea autem non „ esse servanda, & facienda, quæ alibi præter, „ aut contra dicerentur. Illi nimirum honestissima sanctissimaque plerumque decernunt: diligendum esse Deum super omnia: diligendos instar nostri proximos; etiam inimicos, docent; „ *nec glossis corrumpunt, aut dicunt satis esse non* „ *odisse* Neque enim usquam audimus eos ex „ alto docentes, in magna occasione, propter hæc, „ illaque præjudicia, permaneri posse. Erue- „ dum magis oculum ajunt: abscindendas potius „ ma-

„ manus ipsas , & pedes , si scandalizaverint &c.
 „ Haud dicere solent, mutuo, non quidem propter
 „ alios titulos , lucrari quem posse sex , octo ,
 „ decem , & insuper pignus quoque accipere :
 „ sed vel omittunt ista , vel reprehendunt . Nec
 „ item duellum sic , vel sic acceptari posse : bene-
 „ ficia Ecclesiastica ita renuntiari posse , ut non
 „ quidem vendantur , eadem tamen , quæ in
 „ emptionibus solent , summæ vel solvantur , vel
 „ dentur . *Res quippe eadem sæpe esse solent*, & in
 „ nominibus , formalitatibusque honestas omnis
 „ reponitur . Taceo de juniorum relaxatione , de
 „ vestium profanitate , *de impudiciis multis*
 „ atque similibus , quæ sacri Concionatores vel
 „ prætermittunt , vel improbant , approbant ve-
 „ ro ex alto nusquam; quod si facerent, aures pla-
 „ ne offenderent Fidelium: nec Evangelium expo-
 „ nere , sed profanare censerentur . Ipsa itaque
 „ cathedra , sanctitudo etiam loci , & , ut ita lo-
 „ quar , publicitas , Evangelium denique ipsum ,
 „ quod quoquomodo demum tractant , & expo-
 „ nunt , ne prorsus præter dicere audeant , eos
 „ tenet , ne aliter dicant , doceant . Sapienter ita-
 „ que Augustinus ad ista reflectens, de his dictis
 „ Dominum explicavit : *Quæ dicunt* &c.

XXI. Serio ergo secum reputent Confessarii
 unam esse Evangelii viam , unam Christi Theolo-
 giam . Anne Concionatores de omni verbo Deo
 rationem sunt reddituri , secus Confessarii ? An
 istis demulcendi , illis terrendi homines constituta
 lex est ? Numquid Concionatores ex Evangelio ,
 & Con-

& Confessarii ex oppositis libris, Christianorum institutiones eruere debent? Sed minantur Patres, & potissimum Bonaventura: Væ væ Confessariis illis, qui Scripturarum jejuni animarum fuscipiunt regimen! Antequam conscientiae casus resolvant, perpendant, utrum quæ secreto consulunt, deciduntque, ex alto, & coram populo, doctisque viris prædicare audent?

XXII. Non est ergo impostura, & quorundam Antiprobabilistarum figmentum, aliam Pulpitæ esse, aliam Confessionarii Theologiam. Quoniam tanta evidentia palam feci *Interpretis, Tamburini, Leandri, aliorumque plurium Probabilistarum* opiniones de blasphemia, de impudicitia, distare a doctrina P. Pauli *Segneri*, aliorumque omnium Concionatorum, ut neque hiscere quisquam valeat: idemque probaturum me spondeo in omni fere dissidentium opinionum genere. Quod si aliqui opponerent, Moralis Theologiæ Professorum, & Confessariorum munus esse exponere, decidere quid sit rectum, quid honestum, quid justum, quid lethale, quid veniale, & similia: Concionatorum vero declamare adversus vitia, turpitudinem detestari, suadere virtutem, hortari ad perfectionem, permovere animos ad poenitentiam, secus præceptorum difficultates resolvere. Si inquam aliqui hæc & similia opponerent, hi profecto extrema laborarent ignorantia. Quoniam, ut dixi supra, non aliam unquam Patres, & omnium sæculorum Doctores, & Episcopi sancti in Suggestu, aliam in Tribunali poenitentiae

tice doctrinam docuerunt. Nec aliam edidere doctrinam pro Confessionibus, aliam pro Concionibus, ut ex eorum liquet operibus. Hæc, quæ dicta sunt, non ita absolute accipias velim, ut nequeat interdum evenire oppositum. Huc res tota pertinet. Si Ministeria spectentur, facilius in privatis consiliis, quam in publicis Concionibus laxæ doctrinæ disseminantur. Cæterum ad Ministros quod attinet, non desunt Concionatores, qui, quæ sui officii sunt, minus calleant. Idcirco, ut in praxi deprehendatur, a quibus stet veritas, prudentia opus est, & vigilantia.

XXIII. Porro ut compertum fiat, hanc nostram longiusculam digressionem eo tandem spectare; viamque sternere, ut magnopere confirmet quod demonstrandum suscepimus; paucis rem perstringamus. Duo in hac digressionem cursim præstitimus. Unum, Concionatores in morum controversiis, & in hac ipsa nostra de blasphemia questione doctrinam docere cum Casuistarum opinionationibus hostiliter pugnantem. Alterum, hanc Concionatorum de blasphemia, sicut & de aliis, doctrinam erutam esse ex Scripturis, & Patribus, atque adeo in conflictu auscultandum Concionatoribus esse, missis Casuistis. Negabis ne hancopiissimi P. Segneri, aliorumque Concionatorum doctrinam, adversus pravam blasphemandi consuetudinem, haustam esse ex Scripturis, & Patribus? Si id negas, illud ego evinco, & hoc evincendo in semitam regredior.

XXIV. Igitur quod Interpretis, Tamburini, Lean-

Leandri, & cæterorum Juniorum laxa de blasphemandi consuetudine opinio sit. Sacræ Scripturæ evidenter adversa, nemo inficias ibit. Blasphemia enim omnium scelerum gravissimum est, ut docet S. Thomas 2. 2. q. 13. a. 3. Idemque prius docuerant & Chrysostomus in *Psal. 95. Nihil magis impium, quam adversus Deum blasphemia*. Et S. Augustinus lib. contra mendacium cap. 19. *Ideo autem pejus est blasphemare, quam pejerare: quoniam pejerando falsa rei adhibetur testis Deus, blasphemando autem de ipso falsa dicuntur Deo*. Heinc est, quod non adeo frequenter Patres meminerint consuetudinis blasphemandi. Vix enim in suspicionem venire potuit, tam horrendum scelus in hominum morem immigrare posse. Cæterum ut evincam, a Scripturis, & Patribus sceleratum blasphemandi morem improbari, præmitto, eandem esse penes omnes Probabilistas de perjurio, ac de blasphemia ex consuetudine sententiam. Ergo si Scriptura & Patres improbant vel ipsa juramenta ex consuetudine ob periculum pejerandi, quod ex frequenti juramento oritur; quanto severius vetabunt familiarem blasphemandi usum? Sanctum interdum juramentum est. Conscelerata blasphemia semper; ergo eo severius Deus blasphemias prohibet, quo enormior perjurio blasphemia est. Porro hæc adversus jurandi consuetudinem Deus præscribit *Ecclesiast. 23. v. 9. Jurationi non assuescat os tuum: Multi enim casus in illa. v. 12. Vir multum jurans implebitur iniquitate*. Juramentum ut dixi sæpe licitum est. Ni-

Nihilominus, quia jurandi assiduitas perjurii occasio esse potest, consuetudinem jurandi Deus vetat. Quanto itaque severius blasphemias, quæ nunquam licent, quæ semper gravissima sunt omnium scelera, prohibeat necessum est? Secundum opinionem Interpretis, suorumque Probabilistarum Deus dicere debuisset: *Jurationi, blasphemii assuescat os tuum, ut multi casus in illis fiant veniales*. Debuisset dicere: *Vir parum jurans, parum blasphemans replebitur iniquitate formali; Sed vir multum jurans, multum blasphemans replebitur iniquitate materiali, immo juxta Tamburinum nec materiali quidem*. Quid quod Scriptura indefinite cujusque generis peccata ex habitu detestatur? *Jam noli peccare, ne deterius tibi aliquid contingat*. Joan. 5. Item Eccles. 21. *Fili peccasti, ne adjicias iterum*. Secundum nostros Jurini ores dicendum esset: *Jam frequenter peccabis, ut consuetudo peccata excuset*. Blasphæmiæ sunt hæ? At necessario consequuntur doctrinam Interpretis, Tamburini, Leandri, aliorumque. A scripturis ad Patres transeamus.

XXV. S. Joannes Chrysostomus *hom. 14. ad Populum Antiochenum* jurandi consuetudinem, uberrima sua eloquentia improbat, & recentiorum Moralistarum prætextus repellit, occluditque effugia. Inadvertentiam, quam ex consuetudine sive jurandi, sive blasphemandi obtrudunt, his verbis rejicit *n. 2. Nec enim hoc solum habet mali juramentum, quod & temeratum, & servatum juratos pœna faciat obnoxios... sed & aliud*

non minus isto malum. Quod autem hoc est... Quid frequenter & volens, & invitus: & nesciens, & sciens: & serio, & joco loquens, & ab ira saepe elatus, & a multis aliis, omnino pejerabit: & his contradicet nemo: usque adeo planum, & manifestum est, quod multum jurantem perjurum esse necessarium sit. Inter mala ergo, quæ frequentiam jurandi, & blasphemandi consequuntur, S. Episcopus recenset, quod nesciens, & sciens jurabis, & blasphemabis? Clarius versus finem ejusdem hominæ futilem consuetudinis excusationem detestatur. Nec putare idoneam esse nobis defensionem, si consuetudinem prætendamus. Quod enim excusatio hæc sit, & prætextus, nec consuetudinis, sed corporis sit culpa, ab his, quæ jam evenere vobis, persuadere conabor. Civitatis balnea Imperator obstruxit, & lavari jussit neminem: & legem transgredi est ausus nemo, aut factum incusare, aut consuetudinem prætereundere.... Quomodo igitur non absurdum Imperatore jubente vel difficillima sustinere; Deo vero statuente id, quod nec grave est, neque difficile, verum perquam facile, & commodum, contemnere, deridere, & consuetudinem prætereundere? Similia habet hom. 20. ad eundem Populum. Item hom. 1. & 2. Denique in Psal. 49. docet consuetudinem pravam mentis cæcitatem inducere. Longa enim vitiorum consuetudo magnam affert cæcitatem, & amentes efficit, & perspicaces oculos intelligentiæ eruit. Item hom. 7. n. 7. in Epist. 2. ad Cor. Magna quippe, magna, inquam, consuetudinis vis, atque adeo tanta, ut in naturæ necessitatem migret.

XXVI. S. Augustinus pluribus in locis Recentiorum Probabilistarum fucos, & prætextus inconsiderationis, consuetudinisque, quibus horrorem perjurii, & blasphemiae obtegere conantur, dispellit. *Lib. 19. contra Faustum cap. 23.* hæc scribit: *Apostolus in sermonibus, quos habuisse narratur, numquam juravit, ne jurandi consuetudine aliquando vel Nesciens in perjurium laberetur.* Leges ibi plura. *Item lib. de Mendac. cap. 15.* Sed fusius versat hoc argumentum *ser. 30.* de verbis Apostoli, ubi exponit illud *Jacobi 5. ante omnia nolite jurare*, ubi post medium sermonis hæc inter alia scribit: *Quare ergo ante omnia? Isto verbo quod ait: ante omnia, cautus nos facit adversus linguam nostram. Ante omnia, ait, ut attendatis præ cæteris, ut vigiletis, ne surrepat vobis consuetudo jurandi. Nolles ut diceret tibi: ante omnia, ut te adversus consuetudinem intentissimum redderet, ut omnia tua inspiceres, omnes motus linguæ tuæ diligentissime custodires, esses custos malæ consuetudinis tuæ ad eam constringendam? Audi: ante omnia. Dormiebas, pungo, ante omnia spinas admoveo. Quid est ante omnia? Ante omnia vigila: ante omnia intentus esto. Juravimus & nos, passim habuimus istam teterrimam consuetudinem, & mortiferam. Non est mortifera consuetudo, opponunt Probabilistæ, quia tollit advertentiam jurandi, & blasphemandi. Sed persequamur, quæ subdit Augustinus: Dico Charitati vestra, ex quo Deo servire cœpimus, & quantum malum*

sit in perjurio vidimus, timuimus vehementer, & veternosissimam consuetudinem timore frenavimus. Post pauca: objicit sibi Augustinus tritam excusationem Recentiorum. Sed consuetudo est, solet dici. Solet dici, quando non dico: ante omnia. Quid est, ante omnia? Præ cæteris cautus esto, plus ad hoc intentus esto, quam ad alia. Major consuetudo majorem intentionem stagitat.... Lingua facilitatem habet motus: in udo posita est, facile in lubrico labitur. Quanto illa citius, & facilius movetur, tanto tu adversus illam fixus esto. Domabis si vigilabis, vigilabis si timebis, timebis si Christianum te esse cogitaveris. Postremum sub finem sermonis omnes hortatur, ut attentis sint adversus consuetudinem suam, & admoneant se bodie cum ad domos suas venerint, cum consuetudinem suam lapsu linguæ repetiverint; admoneat proximus proximum: Hoc est quod bodie audivimus, hoc est quod obstricti sumus.

XXVII. Si tanto zelo Patres detonant adversus jurandi consuetudinem, quanto ferventius, acriusque non declamarent adversus blasphemandi morem? In hunc quoque invehitur Chrysostomus, sed rarius, quod tam teterrima, & horrenda consuetudo non hominum, sed dæmonum sit. Dicant nunc perdocti Probabilistæ: si blasphemix & perjuria ex consuetudine, aut nulla crimina essent, aut levia, tanta ne severitate jurandi, & blasphemandi morem Patres improbarent? Tanta ne eloquentia urgerent homines, qua increpationibus, qua precibus, qua minis, & suppliciis ad evellendam teterrimam, & pravissimam con-

consuetudinem? Quid ad hæc quæso? Dicturus ne es, Patres improbare juramenta ex consuetudine, secus blasphemias? Sed tantam stultitiam a nemine pronuntiandam crediderim. Velint ergo nolint, fateantur necesse est, Patres Sanctos damnare non modo perjuriam, & blasphemias ex consuetudine prolatas, sed vel ipsam consuetudinem jurandi, tametsi juramentum licitum absolute sit, quia assiduitas perjurii occasio esse potest. Si vera esset Probabilistarum opinio, falsa foret Scripturarum, & Patrum doctrina, injustæ objurgationes, perniciosi hortatus. Perjuriam, & blasphemiam, ablata consuetudine, scelera sunt æterna morte, & terrenis pœnis mulctanda. Si sint ex consuetudine, ex habitu, gravi malitia carent, & nec damnationi æternæ, nec reservationi Episcoporum subjacent. Ergo non expellendæ, sed retinendæ, fovendæque sunt consuetudines istæ? Valeant ergo Patres, valeat Catechismus Concilii Tridentini, qui *part. 3. in. 2. præcep. c. 3. §. 13.* inter alia plura hæc habet: *Infinita enim fere mala ex jurandi (multo magis ex blasphemandi) nimia consuetudine emanare, & sacrarum Literarum auctoritate, & Sanctissimorum Patrum testimoniis comprobatur.*

XXVIII. Sed accedamus ad omnium Patrum exquisitam Epitomen S. Thomam Aquinatem, qui 2. 2. q. 89. a. 2. ad 1. hæc docet: *Dicendum est, quod (sicut Augustinus dicit in lib. de mendacio) Apostolus in Epistolis suis jurans, ostendit, quomodo accipiendum esset quod dictum est: dico*

vobis non jurare omninò: ne scilicet jurando ad facilitatem jurandi perveniatur. & ex facilitate jurandi ad consuetudinem, & a consuetudine in perjurium decidatur; & ideo non invenitur jurasse, nisi scribing, ubi consideratio cautior non habet linguam precipitem. Cum hæc adeo comperta sint, non erubescunt quidam Probabilistæ præcipue P. La Croix in patrocinium laxæ opinionis allegare Angelici Doctoris textum ex hac 22. q. 98. a 3. ad 2. ubi hæc habet: *Ille autem, qui ex lapsu linguæ falsum jurat, siquidem advertat, se jurare, & falsum esse, quod jurat, non excusatur a peccato mortali, sicut nec a Dei contemptu. Si autem hoc non advertat, non videtur habere intentionem jarandi, & ideo a crimine perjurii excusatur.* Argumentum, quod sibi objicit Angelicus, est, utrum semper peccet mortaliter, qui jurat per Deum? Illius responsio est, hunc non semper peccare, quia, si ex lapsu linguæ juret, & invincibili inconsideratione non advertat, se jurare, tunc a perjurii crimine liber est. Porro ne vel in simile perjurium quis incidat, laudata q. 89. a. 2. in c. ad linguæ custodiam hortatur: quia, inquit, imminet etiam periculum perjurii, quia de facili homo in verbo delinquit secundum illud Jacobi 3. si quis in verbo non offendit, hic perfectus est vir. Unde Eccles. 23. dicitur: *Jurationi non assuescat os tuum, multi enim casus in illa.*

XXIX. Verum, ut omnium adversariorum os obstruatur, doctrinam ex S. Thoma huc transcribo,

cribo, quæ nulli subjacet cavillationi. Docet ille absolute, eos, qui ex consuetudine, seu habitu peccant, gravius, intensius, enormiusque peccare. *Ubi est* (inquit 2. 2. q. 156. a. 3. in c.) *major inclinatio voluntatis ad peccandum, ibi est gravius peccatum. In eo autem, qui est intemperatus, voluntas inclinatur ad peccandum ex propria electione, quæ procedit ex HABITU PER CONSUETUDINEM* acquisito. Verum hæc obiter. Pro dignitate, & data opera, hoc argumentum versat 1. 2. q. 78. a. 2. cujus hic est titulus: *Utrum quicumque peccat ex habitu, peccet ex certa malitia*. Cui quæsito hoc præbet responsum: *Quandocumque utitur habitu vitioso, necesse est, quod ex certa malitia peccet. Quia unicuique habenti habitum est per se diligibile id, quod est ei conveniens secundum proprium habitum, qui sic fit ei quodam modo connaturale, secundum quod consuetudo, & habitus vertitur in naturam. Hoc autem, quod est alicui conveniens secundum habitum vitiosum, est id, quod excludit bonum spirituale: ex quo sequitur, quod homo eligat malum spirituale, ut adipiscatur bonum, quod est ei secundum habitum conveniens: & hoc est ex certa malitia peccare. Unde manifestum est, quod quicumque peccat ex habitu, peccet ex certa malitia*. Lege etiam art. 3. & 4. ejusdem quæstionis, ubi plura offendes, quæ veritatem hanc alioquin luculentissimam confirmant. Hanc eandem doctrinam docent Patres omnes. Chrysostomus, ut vidimus, consuetudinem alteram

appellat naturam . Augustinus vocat habitum vitiosum , modo *secundam* , & *affabricatam naturam* , modo catenam ferream , qua plurium annorum spatium astrictus fuit .

XXX. Ut quam sit & Interpretis , & aliorum Probabilistarum laxa , & quasi dixerim erronea horrorisque plenissima doctrina appareat , recurrat sub oculos Interpretis textus . Reservationi non subest , *si blasphemia sit imperfecte deliberata ex prava consuetudine blasphemandi : Nam venialia non reservantur* . Blasphemia , ut diximus , est omnium scelerum horrendissimum . Ergo si prava consuetudo a gravi malitia blasphemus purgat ; potiori jure a gravi malitia immunes constituet eos , qui fornicantur , qui adulterantur , qui furantur , qui occidunt , qui usuras exercent . Aberras , atque Probabilisticæ doctrinæ jejuna te prodis . Distant quam longissime a peccatis linguæ & mentis , exteriora facinorâ , cujusmodi sunt adulteria , furta , fornicationes , homicidia . Scitissime . Primum enim extra controversiam est , juxta Probabilistas , blasphemus , perjuros , detractores , calumniatores , conviciatores , contumeliosos , qui ex habitu peccant , gravis culpæ expertes esse . Suavis quippe , & benigna istorum malitia , quia absque mentis consideratione est , & conscientiæ moribus . Quod si perjuria , blasphemia , hæreses , calumnia , cæteraque linguæ crimina vitioso habitu , & depravata consuetudine parta , gravem malitiam exuunt : potiori jure delectationes morosæ , venerea desideria , affe-

affectionesque impudicæ, bonorum proximi cupiditates: ne multa: omnia flagitia contra nomen, & decimum Decalogi Mandatum, leviusculæ noxæ erunt, dummodo mens humana venosissimo, & putridissimo habitu hoc in luto veluti sus volutetur. Hæc omnia concedant, necesse est, Probabilistæ citati. Nam facilius labitur mens assueta libidini, avaritiæ, in interiores oblectationes, & desideria libidinosa, quam lingua in perjuria, blasphemias, hæreses, & calumnias. Ergo si hæc omnia, quidni & illa gravi carebunt malitia? Cæterum ipsum discrimen inter utriusque generis peccata assignatum, commentitium est. Siquidem quænam libertatis sedes? Voluntas. Perversa consuetudo pejerandi, blasphemandi, hæreses pronunciandi, voluntati libertatem adimit, Probabilistis fatentibus: Ergo & voluntati fornicandi, furandi, adulterandi, occidendi. Probo consequentiam. Actio exterior juxta S. Thomam non addit essentialem malitiam actui interiori. In ipsa voluntate tota substantia, & natura malitiæ sistit, veluti in suo centro; ergo quam libertatem consuetudo prava voluntati adimit in regimine linguæ, eandem illi auferet in aliorum membrorum usu. Externorum membrorum usus, inquis, facilius, & fortius mentem, sensusque excitant, vellicant, & ad considerandum impellunt. Verum id natura sua habet: Cæterum inveteratæ malitiæ prævalentæ, homines pravis habitibus devincti, omnia alia, dum fornicantur, furantur, percutiunt, præter malitiam,

con-

considerant, advertunt, meditantur. Tandem, ut ut exteriorum actuum res se habeat, illud sat est ad improbandam Recentiorum doctrinam, quod doceant gravissima linguæ, & mentis flagitia perversa consuetudine mentem fecundante genita, aut nulla, aut levia esse crimina.

XXXI. Loquantur tandem & ipsi Probabilistæ, suæque exerant arma in propriæ causæ defensionem. Indicata inter disputandum sunt illorum argumenta, obiterque soluta. Verum quia ea, quæ ut se defendant, opponunt, alia absurda pariunt: idcirco enucleatius excutere debemus. Vix propugnari falsa doctrina potest, quin in peiores incidat defensio errores. Arguunt ergo illi: Qui ex habitu vitioso, & iniqua consuetudine pejerant, blasphemant, hæreses evomunt, haudquaquam se peccare, blasphemare, pejerare, convitiari advertunt: Consuetudo enim, quæ altas in anima radices agit, cum veluti in naturam mutata sit, mentem secum abripit, linguaque assuefactionis pondere inflexa, inconsiderata mente pejerat, blasphematque. Ignorantia, seu inconsideratio hæc libertatem aufert, ergo & malitiam. Peccatum enim nullum, libertate sublata, sicuti nulla absque mentis cognitione libertas.

XXXII. In hac Recentiorum doctrina, quam suam tueri causam student, præter ea, quæ hætenus dicta sunt, purus, putusque continetur Pelagianismus, pro ut mox evidenti, nisi me omnia fallunt, ratiocinio evincam. Prius tamen admonere lectorem juvat, præfatum sophisma cen-

centum in locis solvere S. Thomam . Et quod caput est , de ignorantia consequente habitum pravam , hæc habet 1. 2. q. 76. a. 4. ad 1. *Ignorantia , secundum quam omnis malus est ignorans , non est causa peccati , sed aliquid consequens ad causam , scilicet ad passionem , vel habitum inclinantem in peccatum .* Hæc autem ignorantia consequens habitum non diminuit , sed auget malitiam , ut evincit in eodem articulo : & q. 78. a. 4. ad 1. ubi objicit sibi ignorantiam consequentem inveteratum peccandi usum , respondetque . *Ad 1. dicendum , quod ignorantia electionis , de qua obiectio procedit , neque excusat , neque diminuit peccatum . Unde neque major ignorantia talis facit esse minus peccatum .*

XXXIII. Indicavi num. 4. in doctrina Interpretis , aliorumque , quos ille citat , Theologorum , *Ignorantismum* contineri , & *Pelagianismum* . Ignorantismus peccata ignorantie rejicit . Unus ex capitalibus Pelagii , seu verius Cælestii erroribus , Ignorantismus est , ut testantur Augustinus & Hieronymus . Hæc quippe est Cælestii argumentatio , quam sub persona Critoboli S. Hieronymus perhibet lib. 1. *Dialog. advers. Pelagianos . Rogo , quæ est justitia , ut in peccato tenear erroris , cujus reatum non habet conscientia ? Nescio me peccasse , & cujus rei , quam nescio , pœnas luo ? Et quid plus faciam , si sponte peccavero ?* S. Hieronymus innumeris veteris Testamenti textibus evincit admittenda esse ignorantie peccata . Cælestius Hieronymum provocavit

cavit, ut ex Evangelio, si potis est, id evincat. *Numquid* (ut est apud Hieronym. lib. 2. Dial.) *& de Evangelio poteris hoc probare, ut puniatur quisque pro eo quod nesciat, & ante pœnas luat, quam reus sit conscientiae?* Hieronymus os Cælestii obstruit allegatis ex universo Novo Testamento luculentissimis testimoniis. Janfenii interpretamentum, quo contendit, Cælestium loqui de ignorantia invincibili, huncque errorem in Synodo Diospolitana damnatum fuisse, commentum est, & ab Ecclesia damnatum. Expositio itidem Terilli, qua defendit, errorem Cælestii in hoc situm esse, quod is negaret ignorantiam esse pœnam originalis culpæ, evidenter falsa est. Hieronymus in duobus libris præfatis adversus Pelagianos nec meminit originalis culpæ. Utique Pelagiani negantes peccatum originale, consecutione necessaria negabant ignorantiam esse ejusdem partum. At error de peccato originali distinctus omnino fuit ab hac altera quæstione: Utrum sine actuali advertentia, seu utrum peccare non possimus, quin sciamus nos peccare. Hoc negabant Pelagiani: & hunc errorem damnavit una cum cæteris erroribus Ecclesia. Veritas ergo fidei est, admittenda esse ignorantiae peccata. Heinc perfectam habes Epocham invectivæ laxitatis in Evangelicam moralem. Quibus enim principiis Pelagiani liberi arbitrii vires plus justo ampliarunt, divina interiore Gratia, & ignorantiae peccatis de medio sublatis, iisdem Ethices Christianæ rigorem laxarunt. Quoniam quo

quo altius illi extollebant humanæ voluntatis potestatem, eo profundiores agebat superbia radices, superbiam comitatur ignorantia. Et hæc duo sunt amplissima corruptæ Moralis principia. Enim vero, si nemo peccat, nisi cum se peccare cognoscit, quisque se judicare potest, utrum odio, vel amore dignus sit. Superbia ex alia parte tam densam emittit caliginem, ut mentem prorsus obnubilet, obscuretque. Peccabunt ergo homines peccata gravissima, quin cujusque malitiæ fontes evadant, quia minime se peccare advertunt.

XXXIV. Porro, admissa opinione Interpretis, & Probabilistarum, Pelagianismus de ignorantie peccatis necessario consequitur. Negant enim isti blasphemias, hæreses, perjuriam, esse peccata, ob defectum actualis advertentie. Negant hominem sine hac actuali cognitione peccare posse; evidens ergo est, eosdem de medio tollere omnia ignorantie peccata. Ergo illum isti *Ignorantissimum* defendunt, quem in Pelagianis Ecclesia proscripsit. Ex hoc Ignorantismo prodiit, ceu legitima proles, *Philosophismus* similiter ab Ecclesia damnatus. Enim vero si defectus actualis advertentie blasphemandi impedit quominus blasphemiam peccatum sit: obstat quoque ne Deus offendatur, dum mens de eodem actu non cogitat; si vero ad honestatem naturalem simul advertat, hancque violet; tum philosophicum, non Theologicum peccatum peccabit.

XXXV. Brevem aliam digressionem, quæ
pa-

parum a scopo recedit, impertiri mihi a Lectore postulo. Audivi nudius tertius eruditos viros inficientes ignorantiam invincibilem Dei consequi Philosophismum, & cætera, quæ eundem comitantur absurda. Propugnant isti reperiri reapse posse Atheum, quem vocant negativum, invincibiliter Deum ignorantem, Wolffii allegata auctoritate ex sua Naturali Theologia p. 2. §. 247. & seq. Rationis momentum ibi in ejusmodi Athei favorem adductum facto nititur, quod perhibet Historia Academiæ Regiæ scientiarum Paris. an. 1705. Juvenis rusticus annorum 24. a natiuitate surdus, & mutus, fortuito auditu, & lingua donatus, a Theologis curiose accurateque inquisitus fuit, habuisset ne unquam aliquam Dei notitiam? Severo peracto examine, & Rustico constanter adfirmante, nunquam sibi aliquam Dei notitiam illuxisse, tametsi cum Parentibus & incruento Sacrificio assisteret, & Crucis signum formaret, genua flecteret, aliaque similia; conclusum est, invincibiliter illum Deum ignorasse. Et hoc potissimum testimonio nixus Wolffius Deum invincibiliter ignorari posse defendit. Verum si reorum, seu ignorantium testimoniis unice standum sit, nulla in rerum natura dantur ignorantiae crimina. Quænam est ignorantiae sive invincibilis, sive vincibilis notio? Privatio cognitionis. Si enim cujusdam notitiæ radius illucet rei sciendæ, non ignorantiae, sed malitiæ crimen est. Rusticus præfatus testatus est, se nunquam de Deo cogitasse. Esto. Quid inde? Non

Non sane aliud, nisi Deum ignorasse. Ergo absque culpa? Hæc sane illatio ne Logicæ quidem Tyrunculo, nedum celeberrimo, doctissimoque Philosopho Wolffio digna. Aliunde ergo, quam ab ignorantium hominum testimoniis, repetendæ est aut culpa, aut innocentia innocentiae. Quoniam isti non aliud testari valent, nisi quod revera Deum ignorent. At adfirmare ne valent, se vigiles, sollicitosque fuisse in Divini Numinis inquisitione? Adfirmare ne valent nullius se negligentiae, nullius torporis, nullius indiligentiae reos esse, vel fuisse in investigatione veritatis, in aperiendis mentis oculis cælesti luci, qua Deus illuminat omnem hominem venientem in hunc mundum? Si nil horum, ex quibus aut malitia, aut innocentia colligitur ignorantiae, testari isti valent; quid mihi rusticorum ignorantium obtrudis testimonium, ut evincas ignorari invincibiliter Deum posse? Eruas heinc obiter velim, quam vana sit plurium Casuistarum argumentatio, Severissime, inquirunt, examinavi hos, illosque juvenes, & constanter testati sunt, se nunquam credidisse pollutionem, fornicationem, furtumque peccatum esse. Ergo ignorantia istorum invincibilis est. Quam, inquam, sit ineptum ratiocinium istud, ex paucis, quæ delibavi, palam est. Negamus ergo, & pernegamus, reperiri posse Atheum negativum invincibiliter Deum ignorantem.

XXXVI. Instabant eruditi viri. At quid responderes illis, qui opposita opinione convicti

ne-

negarent ex hac invincibili ignorantia consequi illa absurda , quæ ex Philosophismo Casuistico sponte fluunt ?

Reposui Philosophismum necessario consequi ex hypothesi ignorantiae invincibilis Dei . Invieta quippe est argumentatio isthæc . Fidei veritas est , ignorantiam vere invincibilem a peccato excusare . Ergo qui Deum esse invincibiliter ignoraret , Deum offendere nequiret . Responsum fuit : *Nimis ampla illatio , quæque antecedentis capacitatem excedit . Qui invincibiliter Deum ignorat , non peccat , Deum non recognoscens , non colens , non diligens , verum habet . Non ignorat autem proximum esse diligendum , non esse contra ipsum aliquid committendum , quod sibi fieri non vult : Ergo si contra ipsum peccet , & Philosophicum , & Theologicum est ejus peccatum .* Quam sibi constet hæc ultima consequentia , nemo non videt . Legitima enim illatio hæc est : ergo illius peccatum Philosophicum est , non Theologicum . Nam si nemo peccat in eum , quem ignorat , peccare profecto nequit in Deum , quem ignorare docent . Porro peccatum , quod non est in Deum , nequit Theologicum appellari . Cedo . Si quis proximum invincibiliter ignoraret , peccaret ne ipsum occidendo ? Occidis Fratrem invincibiliter existimans esse feram , peccas ne ? Minime inquis . Invincibiliter Deum pro lapide habes . Ergo nullo modo in Deum peccas . Ergo veræ & legitimæ sunt omnes consequentiæ , quæ ex Philosophismo deduci solent . Reponebant
eru-

eruditi viri. *Quantumvis supremum Numen quis ignoret, videlicet quod omnia malefacta in iudicium adducat, improbet, puniat, huiusce tamen summa, & increata Iustitiæ, & Veritatis radius fronti indelebiliter gestat impressum.* Recte, & vere. Ergo in fumum occidit jactatus negativus Atheismus. Increata Veritas, increata Iustitia Deus est: Ergo si radius increatæ Veritatis in omnium animis impressus sit, in omnium animis Dei notio insculpta est. Eruditorum itaque ratiocinium eo tandem recidit, ut illi de medio tollant quamlibet inculpatam Dei ignorantiam, negentque Atheismum illum innocentem, quem prius propugnandum cum Wolffio susceperant. Verum hæc obiter dicta sint, ut votis satisfacerem eruditi viri, qui in Epistola ad Amicum data hoc magnopere flagitabat.

XXXVII. Rifu fortasse, & cachinnis *Interpres* Casuum, & cæteri Probabilistæ excepturi sunt. quæ hactenus diverticuli ergo ex eruditis viris recensuimus. Si enim, qui proximum lædit, Deum offendit, ut contendebant isti; potiori jure, qui Deum blasphemias incessit, in Deum gravissimum scelus peccat, tametsi actu de Deo non cogitet, nec advertat. Verum quaecumque sit illorum super iis iudicium, nihil mea id interest. Satis mihi est, invictis rationum momentis fecisse palam, blasphemias ex consuetudine, non levia, sed gravissima esse scelera. Satis mihi est & veritatem summi-momenti, & Episcoporum, qui reservant crimina blasphemantium ex consuetudine

prudentiam, sapientiamque ab ineptis interpretamentis vindicasse. Satis tandem mihi est, ab Hæreticorum calumniis, Catholicorum doctrinam vindicasse. Familiare quippe Hæreticis est, quorundam Catholicorum errata in universæ Romanæ Ecclesiæ doctrinam regerere. Porro doctrina, quam de consuetudine blasphemandi hætenus refutavi, adeo laxa, & scandali plena est, ut vel ipsi Hæresiarchæ Calvino horrorem incutiat. Ut aliquo tangantur pudore Casuistæ illi, qui gravis culpæ expertem effutiunt blasphemandi, pejerandique consuetudinem, lubet transcribere quæ contra assuetudinem jurandi Calvinus scribit *lib.2. Institut. cap.8. §. 25.* „ Vile, & vul-
 „ gare redditur Dei Nomen, cum veris quidem,
 „ sed supervacuis juramentis adhibetur. Siqui-
 „ dem accipitur hic quoque in vanum. Quare,
 „ non satis fuerit a perjurio abstinere, ni simul
 „ meminerimus, jusjurandum, non libidinis,
 „ aut voluptatis, sed necessitatis causa permis-
 „ sum, & institutum, ideoque extra licitum il-
 „ lius usum egredi, qui rebus non necessariis ac-
 „ commodat. Porro non alia prætendi necessi-
 „ tas potest, quam ubi vel Religioni, vel chari-
 „ tati est serviendum. *Qua in re nimis licen-*
 „ *tiose hodie delinquitur, eoque intolerabilius,*
 „ *quod assuetudine ipsa pro delicto imputari desit,*
 „ *quod certo apud Dei Tribunal non parvo æsti-*
 „ *matur. Passim enim promiscue temeratur Dei*
 „ *nomen in nugacibus colloquiis: nec male fieri*
 „ *putatur, quia in tantæ improbitatis possessionem*
 „ *longa,*

„ longa , & impunita audacia ventum est . „ Quæ non scriberet adversus frequentiam blasphemandi, si tam acriter invehitur contra assuetudinem jurandi vel ipsam veritatem ? Hactenus contra blasphemos . Nunc nonnulla alia ejusdem *Interpretis* sub examen induco .

I N T E R P R E S pag.9.

QVaritur septimo: an reservationem incurrat, qui non mere subjective duobus de reservatione blasphemiae, qui dubius de reservatione Blasphemiae, vel de reservatione talis blasphemiae, blasphemet? Resp. Negative. Nimis juxta nostram Regulam quartam non sunt reservata, ita ut reservatio incurratur, peccata, de quorum reservatione *QUOMODOCUMQUE* dubitetur. In altera editione in 8.^o deest *To Quomodocumque*. Cur autem aut insertum sit libello grandioris formæ, aut non correctum, si displicet, penes Authorem sit.

XXXVIII. Hoc postremo interpretamento mirum in modum confirmat quæ superius docuit, ut nempe penitus eludat reservationis decretum. Quoniam si argumenta, inquit ille, hactenus allata, te minime revincerent, nempe blasphemias ex consuetudine non esse reservatas, negare saltem nequis, hoc a Theologis junioribus in disputationem adduci. Sed quod in utramque partem Theologi disputant, dubium est. Quod autem dubie tantum reservatum est, a reservationis lege immune est. Ergo blasphemiae ex consuetudine

nullo modo reservatæ sunt . Et quod summo opere animadvertere debes , hæc de blasphemia doctrina universalis est pro omnibus casibus reservatis sive Papalibus , sive Episcopalibus .

XXXIX. Ita ne vero ? At sacra Congregatio Concilii ex *speciali mandato* Clementis VIII. Decretum edidit an. 1601. die 9. Januarii , quo vetuit , ne quis cujusque privilegii prætextu a casibus *dubie* reservatis absolvat . Hæc sunt verba Decreti : *Ne quis &c. Sub prætextu privilegiorum ab ullo ex casibus clare vel dubie reservatis in Bulla in Cæna Domini legi solita contentis , vel alias quomodocumque Sedi Apostolicæ reservatis , vel reservandis absolvat .* Hæc sacra Congregatio interpretis officio fungitur . Nullum jus condit , sed jus interpretatur . Porro Decretum istud adversus Regulares latum est , quod vi suorum privilegiorum contendebant in casus reservatos jurisdictionem . Sacra autem Congregatio declaravit , Regulares , ad hoc quod attinet , communi juri subjectos esse : & quemadmodum Confessari Sæculares nequeunt a casibus sive *dubie* , sive *clare* reservatis absolvere , ita neque Regulares . Nec est quod opponas , in altero Decreto ejusdem Clementis VIII. jussu edito anno 1602. die 26. Novemb. nullam fieri istius particulæ *dubie* mentionem . Quoniam inepta fuisset ejusmodi repetitio . Declaratum jus erat : ut quid ergo eandem repetere interpretationem ? Quid , quod non minus vox *dubie* , quam vox *clare* omissa in hoc secundo Decreto fit ? Si ex omissione vocis *dubie* colligeretur

geretur jurisdictionis potestas in casus *dubie* reservatos, eadem ratione colligeretur ex omissione vocis *clare* potestas in casus *clare* reservatos, quod nemo dixerit. Accedit, quod opinio Interpretis damnata videatur in prima propositione Innocentii XI. *Non est illicitum in Sacramentis conferendis sequi opinionem probabilem de valore Sacramenti relicta tutiore* &c. Potestas autem jurisdictionis dubio procul ad valorem Sacramenti pertinet, cum, ea sublata, nullum prorsus Sacramentum sit. Plurima alia omitto ne brevitatis limites transiliam.

XL. Quæ hætenus allata sunt, reponit *Interpres* casuum, evincunt dumtaxat, opinionem meæ contrariam esse probabilem, quod & ipse fateor. At mea quoque sententia probabilis est. Sit, per me licet, probabilis opinio tua. At cum opposita sit tutior, tua rejecta, hæc amplectenda est, sic præcipiente Ecclesia. Falleris, reponit *Interpres*, sensumque ignoras proscriptæ thesisi. Distinguas oportet cum eruditis Junioribus, & potissimum cum P. Dominico Viva in hanc *Prop. n. 20.* opinionem probabilem, quæ formam, materiamque Sacramenti spectat, ab opinione probabilis, quæ jurisdictionem respicit. In priori, non in posteriori casu, relicta probabilis opinione, amplectenda tutior est. Quid acutius excogitari poterat? Ecclesia damnat usum probabilitatis in iis, quæ ad valorem pertinent Sacramenti. Ad Sacramenti valorem essentialiter pertinet jurisdictionis, sine qua, omnibus fatentibus, Sacramen-

tum nullum est. Ergo damnatus est usus jurisdictionis probabilis relicto tutiore in Sacramentis conferendis. Quid ergo hic materiam, formamque Sacramenti obtrudis, cum in thesi proscripta nulla istorum mentio sit? Cur sequendam tutiorem in usu materiæ, & formæ asseris? Alii dicent, Pontificem præcipere usum sententiæ tutioris, dum disputatur de jurisdictione, secus dum disputatur de materia, & forma. Et qua ratione hanc tu rejiceres interpretationem, eadem alii respuunt tuam, ut arbitrariam, & chimæricam. Nam Ecclesia absolute damnat usum opinionis probabilis in iis, quæ *valorem* spectant Sacramenti; ergo siue valor iste a jurisdictione, siue a materia, formaque pendeat, perinde est. Propositio enim, ad hoc quod attinet, indefinita est: ergo omnia ad valorem pertinentia comprehendit.

XLI. Occurritne discriminis ratio? Quammaxime, subdit Interpres. Quænam amabo te? Hæc quam assignant nostri Recentiores. Cum opinio probabilis versatur circa materiam, & formam Sacramenti, tum frustrationis periculo illud exponitur: secus in usu opinionis probabilis de potestate jurisdictionis. Cur hoc? Quia Ecclesia Parens pientissima, si jurisdictio desit, supplet. Hoccine discrimen? An non vides futilem hanc esse principii, ut vulgo dicitur, petitionem? Ecclesia absolute præcepit amplectendam in Sacramentorum administratione tutiorem sententiam. Deliberato animo tutior rejicitur, quia si jurisdictio desit, Ecclesia supplebit? Si supplere
Eccle-

Ecclesia vellet, non præciperet usum tutioris, proscripta probabilitate. Ecclesia supplet in re dubia, dum urget necessitas, & ut succurrat indigentibus: secus ut faveat Probabilistis pro ingenio opinantibus. Iterum reponunt isti. Num Ecclesia clementissima Mater æternum tot animas perire patietur? Jurisdictionis defectum supplere illa valet: Nulla vero in materiam, & formam potestate pollet: idcirco harum inopiam supplere nequit. Jurisdictio tota illius est. Ergo, ut pie de illa sentiamus, dicere cogimur, absolutionem probabili jurisdictione collatam, eidem probari. Hæc sunt argutationes Probabilisticæ, quas jam convellimus, dicendo, pientissimam Matrem Ecclesiam esse, ut succurrat filiis in necessariis, secus ut faveat in superfluis. Adversarii, ut *Probabilismi* jurisdictionem amplificent, dubiam, seu probabilem in Sacramenta jurisdictionem suppleri ab Ecclesia contendunt. Ut eos ad incitas redigam, admitto, probabilem esse a pietate Matris Ecclesiæ repetitam argumentationem. Negabuntne illi tutiorem esse oppositam, quam nos defendimus? Ergo in Sacramentorum usu hæc, contraria rejecta, amplectenda est. Si dixerint, opinionem suam *certam*, nedum probabilem esse, ut his cuniculis penitus eludant Ecclesiæ doctrinam; assignent nobis istius *certitudinis* principia. Nam argumentatio ex pietate, & clementia Ecclesiæ deducta, ad summum, probabilem opinionem reddit, quæ in Sacramentorum usu falsa evadit. Ut quam sit perridicula hæc conficta certitudo,

titudo, palam fiat, ob oculos revocentur Decreta Clementis VIII., & argumentationes inde collectæ. Post, hæc alia adjiciantur. Ecclesia, tametsi mater clementissima, non supplet jurisdictionis defectum, dum Confessarius ignorans casum esse reservatum, ab eodem absolvit: ergo neque dum absolvit ab eo, de quo dubitatur, sitne reservatus. Antecedens vel ipsorum Adversariorum confessione verum est, potissimum in casu, quò unicū peccatum reservatum, aut reservata excommunicatione affectum, extra necessitatis articulum absolutum a Confessario, illud ignorante, fuerit. Et tamen si argumentatio ex pietate Ecclesiæ deducta quidquam valeret, longe probabilius evinceret, Ecclesiam supplere jurisdictionem in casu ignorantie invincibilis, quam in casu dubitationis. Hoc evidens est. Nam dum quis dubitat, casum esse reservatum, recurrere ad Superiorem potest, ignorans non potest. Nec est, quod repomas, in casu ignorantie reservationem esse certam. Nam modo dispicimus vim argumentationis arcessitæ a pietate Ecclesiæ, quæ, ut animarum periculo succurrat, supplere dicitur jurisdictionem, si desit. Æquale autem est animarum periculum, quoties jurisdictio desit: sive desit ex ignorantia Confessarii, sive ex probabili opinione casus *dubie* reservati. Tandem a duobus fere jam sæculis disputatur de hac probabili jurisdictione. Ecclesia quamquam Mater piissima nunquam declaravit, se velle supplere jurisdictionem dubiam: immo sæpius declaravit oppositum, ut.

ex

ex Decreto Clementis VIII. constat, idque luculentius confirmari potest altera Declaratione Gregorii XIII. Disputabatur olim, utrum Decretum Tridentinæ Synodi *sess. 23. cap. 15.* comprehenderet etiam Prælatos, quibus jus est eligendi sibi Confessarios: nimirum possent ne isti eligere sibi Confessarium non approbatum ab Episcopo? Ad hanc dirimendam Controversiam destinatum Romæ fuit decem Cardinalium Collegium, quorum quinque in affirmantem, quinque in negantem opinionem concedebant, quorum rationes recenset Doctor eximius Suarez *Disput. 28. de pœnit. sess. 4. n. 7.* additque, Summum Pontificem Gregorium XII. respondisse: *In re dubia tutius est adbarere Decreto Concilii Tridentini*, videlicet, ne Prælati eligere valeant in Confessarium simplicem Sacerdotem ab Episcopo non approbatum. Afferant Probabilistæ vel unicum documentum, quo evincant, Ecclesiam declarasse, se supplere velle jurisdictionem dubiam. Nullum hætenus assignarunt. Ergo evidenter patet, comentitiam plane esse, atque chimæricam certitudinem, quam jactant suæ opinionis. Rationes cum rationibus conferantur. Illi ipsi negare non poterunt, rationes, quas nos adduximus, ut minus evincere dubium esse, utrum Ecclesia supplere velit jurisdictionis defectum. Sed usus dubiæ opinionis in conferendis Sacramentis damnatus ab Ecclesia est. Ergo damnata quoque remanet eorundem opinio.

XLII. Victas manus darem, inquit Interpres, nisi aliud grave momentum me retraheret. Etiam-

num quid reponas , habes ? Utique . Ediffere ergo . P. Gregorius Gobat de re casuistica optime meritus , improbo labore collegit *tract. 7. n. 116. centum* , & *triginta Authores* docentes , licitum esse absolvere cum jurisdictione probabili . Porro P. Dominicus Viva in suo cursu Theologico *To. 2. par. 6. q. 8. a. 2.* hoc argumentatur pacto a *posteriori* . *Non est probabile centum & triginta Doctores a Gobat relatos in re tanti momenti esse deceptos* , & *indiguiffe censura* . Hoc profecto argumentum magnum mihi facefferet negotium , si Interpres vadem se constitueret magham istorum partem Doctorum ex illis non esse , de quibus hæc scribit P. Antonius *Térillus* celebris Societatis Jesu Theologus in *prologo ad tract. de conscientia* .

„ *Innumerabiles sunt [idest plusquam centum &*
 „ *triginta]* qui a 30. annis Summis casuum , re-
 „ rumque moralium Tractatibus Bibliothecas im-
 „ plexerunt . Quid autem facerent , ut *ad fa-*
 „ *mam* , quam aucupabantur , pervenirent ? . . .

„ In opiniones *laxiores* oculos animumque con-
 „ jecerunt , gnari eas præ omnibus vulgo placi-
 „ turas Vidi ego ex hisce recentioribus
 „ nonnullos , viros cæteroquin egregios , qui
 „ cum in rebus summi momenti ad Dei legem ,
 „ & conscientie obligationem pertinentibus , ab
 „ unanimi omnium sententia ad intolerabilem
 „ opinandi laxitatem declinassent , aliud tamen ,
 „ quo moverentur , quam argumentum a simili
 „ ductum , non habebant . *Vidi* , & *exhorruï* . Ne-
 „ que hic stetit quorundam audacia , Plurimi
 „ enim

„ enim etsi doctrina longe inferiores, similem
 „ quoque arguendi modum sibi licitum ex laxis
 „ resolutionibus ad alias laxiores iter sibi, re-
 „ ctius dixerim, & sibi, & aliis præcipitum
 „ aperuerunt. Nec defuere qui laudi sibi verte-
 „ rent laxiores sententias in unum colligere, eas-
 „ que tanquam legitimas Conscientiæ regulas
 „ sub specioso Probabilitatis tegmine venditare.
 „ *Immo incredibile non est, eos sub subtili satana*
 „ *insinuatione deceptos sub humanitatis cujusdam*
 „ *lenocinio, mutuique honoris specie, quibusvis*
 „ *aliorum dictis probabilitatem ideo attribuisse,*
 „ *ut quam ipsi prærogativam prioribus ultro de-*
 „ *discent, eam ipsis posteriores non inviderent.*
 „ *Hac arte dolosus inimicus postquam doctiores,*
 „ *qui & sibi invigilare, & aliis prospicere debue-*
 „ *rant, prægustato plausu amplioris famæ per la-*
 „ *xarum opinionum evulgationem sibi certo acqui-*
 „ *rendæ fascinasset, per eos nimis incautos in*
 „ *Campo Moralis Theologiæ optimo severarum*
 „ *opinionum tritico abunde sato detestanda laxi-*
 „ *tatis zizania superseminavit, & abiit; con-*
 „ *scius quippe erat ea absque boni tritici jactura*
 „ *nunquam evellenda.* „

XLIII. Prolixam posceret expositionem tex-
 tus ejusmodi, in quò & præterita facta narran-
 tur, & futura prædicuntur. Cursim aliqua præ-
 ter, aliqua juxta institutum indigitabo. 1. O-
 mnes, nemine excepto, præfatos Autores Teril-
 lus asciscit in Probabilisimi patrocinium. 2. Isto-
 rum quoque plures ingrediuntur censum contex-

tum a P. Gregorio Gobat. Atque adeo nullius est numerus, qui opponitur, auctoritatis comparatæ ad auctoritatem Ecclesiæ in thesi proscripta oppositum decernentis. 3. Via ad aucupandam famam, plausumque mundanum, laxitas est, minime severitas opinionum. Arctam quippe Christi viam carnales homines calcare detrectant, clamantque: *Durus est hic sermo*. 4. Authores isti *subtili Satana insinuatione* (verba sunt Terilli: avertant enim Superi, ne talia fari ausint Antiprobabilistæ) *decepti* sub benignitatis lenocinio, *mutique honoris specie*, aliorum opiniunculis probabilitatem tribuerunt, ut quam laudationum prærogativam ipsi Prioribus tribuerent, eandem sibi posteris non inviderent. 5. Postremum divinator, *laxitatis zizania*, quæ in Campo Theologiæ Moralis *optimo severarum* (ideest verarum) *opinionum tritico abunde futo* superseminavit inimicus Probabilismus nunquam absque boni tritici jactura eyellenda fore. Heinc collige oraculum Christi Domini, quo jubet sinere, ut zizania simul cum tritico crescant usque ad messem, indicare nobis non mores modo corruptos in Ecclesia tolerari, verum etiam & opiniones falsas. Quod dictum velim in quosdam, qui Christianæ doctrinæ minus periti, dum in Moralistis aliquam, quantumvis laxam, opinionem legunt, quæ damnata ab Ecclesia non sit, continuo inferunt, optimam esse conscientiae regulam. Quod confectarium Alexander VII. damnavit in propositione vigesima septima. 6. Quæro tandem ab Interprete num
in

in centum, & triginta Doctoribus citatis a P. Gobat vel unus computetur Doctor Ecclesiæ? Quid, quod Authores laudati scripserunt antequam Innocentius XI. damnaret 1. Propositionem? Idcirco nullius sunt authoritatis. Quid si Doctores isti essent paucis exceptis, illorum quos Pater Michael Elizalde *Summularios* vocat, qui velut oves, & aves unius Authoris opiniunculam dummodo laxam, & fuco benignitatis illitam, & sæpe male intellectum, sequuntur? Exemplum in priori Epistola luculentum habetur tot Moralistarum, qui ex fortuito, jocofoque mamillarum tactu, a Navarro excusato a gravi culpa, ob peculiare circumstantias, collegerunt Regulam generalem. Verum, quod ad extremum Moralis Doctrinæ detrimentum pertinet, est, quod ex hac Juniorum multitudine inferunt non modo probabilem, sed certam esse opinionem, cui isti patrocinantur.

XLIV. Istius rei exemplum nobis *Dissertator* Casum præbet in altero suo opusculo inscripto *Praxis Tribunalis pœnitentiæ*, & in hac Dissertatione sua in casus reservatos citato. In hac pœnitentiæ praxi *disp. 1. q. . . n. 4. pag. 8.* sequentem docet opinionem. *Pœnitens tamen, qui de peccatis commissis doleat ob MALA TEMPORALIA, quæ peccando metuantur, (idem sicut modo dictum est proportionaliter patet quo ad bona temporalia, quæ non peccando sperentur, dicendum esse) tanquam a Deo inflictarum, si cetera adsint & gratiam Sacramenti pœnitentiæ accipit, & idem Sacramentum suscipit.* Quo momento tam laxam

con-

confirmat opinionem? Allegat primum in ejusdem patrociniū decem & octo Doctores, quos inter sunt sequentes: Diana, Tamburinus, Gobat, Escobar, Leander, La Croix, Illung, Sporer, Reifensuel, Giribaldi, Viva, Reginaldus, Zuccherius, Clericatus, Bonacina, Suarez, Lugo, Mastrius. Quodnam secundum momentum? *Quia in Scriptura* (inquit) *legitur temporaliter quoque a Deo peccata puniri*. Quodnam tertium? Quia Tridentinum dicit *ex gehennæ, & pœnarum metu*. Per vocem, inquit, *pœnarum se intelligere mala temporalia tanquam a Deo inflita indicat*. Obiter quæso adverte quam sincerum, quam obvium sit commentum istud! Duo dicit Concilium, & conjungit particula copulante *Ex gehennæ & pœnarum metu*. Intellige nunc quod tibi arridet *pœnarum* nomine. Illud luculentum est, a Concilio primo loco ad concipiendum peccatorum dolorem designari gehennæ considerationem. *Ex gehennæ & pœnarum metu*. Qua ergo ratione excluditur quod primo loco Tridentinum ponit? Etiam si pœnarum nomine intelligeret temporalia damna, quod tamen falsum prorsus est: hoc tamen evidens est, in primis gehennæ timorem Tridentinum præscribere. Et Probabilistæ audent in Concilii propositione luculentissima per summam vim detruncare potissimam partem, & ad sola mala temporalia totum sensum restringere? An & spei Theologicæ, quam pœnitens in Deum convertendus habere debet, sola bona temporalia, *quæ non peccando sperentur*, proponunt?

Hæc

Hæc tamen obiter & præter institutum. Quæ sequuntur negotium conficiunt. Subdit ergo *loc. cit.* Interpres: *Porro hæc sententia tum auctoritate fere OMNIUM Theologorum, tum allata probatione, est PROBABILISSIMA, seu moraliter CERTA; ideoque licite PRACTICABILIS; quin obftet eam circa valorem Sacramenti versari, ut inter ceteros optime monet Zuccherius.* Plurima hic expendenda occurrent. Censuram olim severam inurebant Theologi sententiæ propugnanti, attritionem ex solo gehennæ metu conceptam sufficere ad Sacramentum pœnitentiæ suscipiendum. Alexander VII. vetuit alterutram sententiam censuris notari. Benignioris, seu laxioris Ethices Patroni, post latum decretum, opinionem de attritione concepta ex solo metu damnorum temporalium a Deo per fidem cognito inflictorum, & ex spe assequendi bona pariter temporalia, promovere cœperunt. Sub initium aliqui Theologi eam docebant, ut speculative Probabilem. Innocentius XI. ut sanctitati Sacramentorum occurreret, damnavit, ut vidimus, usum opinionis probabilis; quando disputatur de valore Sacramentorum, relicta tutiore. Vidimus paulo ante nostros Probabilistas, interpretantes thesim hanc proscriptam, docere, veram illam esse, quando probabilis opinio spectat materiam, & formam Sacramenti, ut videre potes apud Patr. Viva in 1. *propof. Innoc. n. 20.* secus si respiciat jurisdictionem, licet essentialiter requisitam. Nunc opinio Probabilis spectat materiam. Dolor enim

enim est materia Sacramenti pœnitentiæ. Quænam tutior opinio? Concipere dolorem ex metu gehennæ, pœnarumque æternarum: aut ex metu damnorum tantum temporalium? Nemo sanæ præditus mente inficias ibit priorem tutiorem esse. Ergo damnata posterior. Quid ad hæc reponit Interpres Casuum? Respondet: *Nec obstat eam circa valorem Sacramentorum versari, ut inter ceteros optime monet Zuccherius*. Næ hæc robustissima ratio! Quando sermo est de jurisdictione, eludunt propositionem damnatam, dicendo, intelligendam esse cum disputatur de valore Sacramentorum pendente a materia, & forma. Quando postea opiniones probabiles revera spectant materiam, & formam, quid respondent? Reponunt id non obstat, quominus eligatur opinio probabilis relicta tutiore. Eccur hoc? Quia Probabilistæ sic docent. Recte, & bene. Sed quod cujusque fidei limites transilit, est illa periocha: *Porro hæc sententia tum auctoritate fere OMNIUM Theologorum, tum &c. moraliter certa est*. Dicat nobis Interpres. Si quis hæc scriberet: OMNES fere Theologi docent attritionem conceptam ex solo metu pœnarum æternarum inferni, excluso quolibet charitatis amore, sufficere ad pœnitentiæ Sacramentum, non ne certissimam mendacis notam subiret, quod in facto luculentissimo mentiretur? Qua ergo censura inurendus ille sit, qui scribit *OMNES fere Theologos* propugnare, ad Sacramentum pœnitentiæ satis esse attritionem ex solo metu temporalium damnorum,

rum , & ex sola spe bonorum terrenorum ; judicium penes Interpretem esto .

XLV. Adeo evidens est opinionem Interpretis damnatam esse ab Ecclesia , ut vel ipse P. Cardenas licet Probabilismo speculativo, non tamen practico , addictus , expresse hoc testetur *in propos. 1. Innoc. XI.* Lubet transcribere verba ejusdem *ex differ. 2. cap. 6. a. 2. q. 2. n. 72. de attritione ex metu pœnarum temporalium .* „ Dico „ secundo . Si hæc sententia doceat , esse licitum „ ducere ad praxim id genus attritionis , ita ut „ dicatur esse licitum confiteri advertenter cum „ ea sola attritione (quod non asserunt Autho- „ res hujus opinionis) *subjacet* damnationi . Pa- „ tet conclusio : Illa opinio subjacet huic damna- „ tioni , quæ versatur circa valorem Sacramen- „ ti , cum illa attritio sit pars essentialis Sacra- „ menti : & illa quidem est minus tuta . Nam si „ coram Deo non est vera , Sacramentum pœni- „ tentiæ frustratur . Ergo si docet , licitum esse „ eam deducere ad praxim , *subjacet huic damna- „ tioni.* „ Casuum autem *Dissertator* docet , quod fit *Probabilissima , & mortaliter certa , ideoque licite Practicabilis , ut optime monet Zuccherius.* Doctus piusque Cardenas excusat Theologos , qui scripserunt ante Innocentium XI. quod præfatam sententiam docuerunt , non ut ad praxim deducendam , sed speculandi , & disputandi gratia , Verum, ut sit de hoc , illud est. evidens , damnatam nunc esse ejusmodi opinionem . Plurima alia , quæ confutatione pariter indigerent , missa facio .

XLVI.

XLVI. Antequam dicendi finem faciam, ad te Præsul illustrissime, orationem converto. Quæ a te in mandatis accepi, defunctus sum. Utinam felici eventû. Causam sane justam, sanctam, atque necessariam me propugnasse, nullus dubito. Utrum vero ea, qua par est efficacitate, & gravitate id peregerim, aliorum esto iudicium. Scribendi ratio quibusdam forte displicebit. Sed injuria. Deridentur utique, data opportunitate, laxæ opinionationes; jocosis salibus, & ironiis moderate perfricantur. Sed salvo semper in Adversarium obsequio, & reverentia. Nec est quod opponant, ex opinionum refutatione lædi earundem Magistros; quoniam si id sequatur, non censoris, sed materiæ officium est. Atque adeo non nobis, sed sibi malum, si quod est, vertere debent. Rei confutandæ stylum accomodandum esse, docent omnes: idque Patres nostri Sanctissimi, potissimum Chrysostomus, Nazianzenus, Basilii, Augustinus, Hieronymus, Bernardus, tametsi Melissus, non modo dum in hæreticos, verum etiam cum in Catholicos, & Monachos ipsos scripsere, præstiterunt. Celebris in hoc genere est Tertulliani *adver. Valent. cap. 6. Regula. Multa sunt sic digna revinci, ne gravitate adorentur: vanitati proprie festivitas cedit. Congruit & veritati ridere, quia lata: de amulis suis ludere, quia secûra est. Curandum plane, ne risus ejus videatur indignus. Caterum ubicumque risus dignus, officium est.* Quid? Impune illi evulgabunt, sacrarum Virginum genas vellicari, ubera attre-

ctari:

Etari : augustam tremendamque Dei Majestatem perjuriis , & blasphemiis proscindi absque gravi scelere posse : Qui vero doctrinam hanc in proximum perniciosam , in Deum impiam , jocos , & salibus deridendam , execrandamque propinant , pœnas dabunt æternas ? Vidimus in priori Epistola P. Tamburinum mirificam illam delectationem *Non libidinosam*, captam ex tactu mulieris , ut mulieris , oratione , elegantiss & leporibus illita , exponentem . Splendidis ille metaphoris , & lenociniis , rosarum fragantia , purpuræ , & liliorum coloribus , suavissimisque odoribus veneris putorem fucavit , ut amabilem , & honestum lectoribus exhiberet . Qui contra veritatem Evangelicam propugnare student , utantur stylo languido , serpente , salebroso , qui fastidium , & somnum Lectoribus conciliare sit aptus ? *Illi* , (inquit S. Augustinus lib. 4. de doct. Christ. cap. 1.) *animos audientium in errorem moventes , impellentisque , dicendo terreant , contristent , exhilarant , exhortentur ardenter : isti pro veritate lentissimi , frigidi que dormitent ? Quis ita desipiat , ut hoc sapiat ?* Usque adeone progressuri sunt hominum ausus , ut venialia reputent læsæ Majestatis divinæ horrendiora scelera : e contrario autem violatæ charitatis erga Moralistas postulent eos , qui istorum opiniones , scandali errorisque plenas , improbant , labefactant ? Quodnam hominum genus istud ? Dum non habent quid in reprehensa crimina , & confutatos errores reponant , rationem reprehendendi , atque ipsum reprehensorem

car-

carpunt, mordent? Quid si paulo acrius in æternæ salutis negotio refutati errores essent? Excan-
desceres ne in eos, qui voce severa te admonerent,
ut a cibo veneno infecto abstineas? Sed quid ultra
provehor in accusatione ineptissima repellenda?

XLVII. Tu interim, Præsul Sapientissime,
pro eo, quo in sanam doctrinam fartam tectam
custodiendam zelo flagras, has qualescumque epi-
stolas in obsequiū erga te mei testimonium susci-
pias velim. In his Dei honor, quo nihil sanctius,
nihil augustius nobis esse vel potest, vel debet, a
blasphemiis sacrilegis: Virginum castitas ab impu-
dicorum tactionibus: potestas Episcoporum in
casibus reservandis ab iniquis interpretamentis
asseruntur, propugnantur. Hæc profecto ejus-
modi sunt, quæ te permovere magnopere debent,
ut nullum non moveas lapidem, quo Urbe, &
agro erroneæ opiniones exterminentur. Vidisti
non ita pridem quæ adversus paupertatis Mona-
sticæ votum prodire: legis nunc quæ ad violan-
dum pariter illibatæ Castitatis Monialium votum
typis sunt edita. Si hæc impunita permittantur:
Nisi propagandæ laxitatis impetus cohibeatur,
quo tandem Evangelicæ Moralis sanctitas deve-
niet? Sed quid ego sponte currentem calcaribus
urgeo? Macte igitur virtute, Antistes Illustrissi-
me, & meum qualemcumque pro asserenda a per-
niciosis opinionationibus saniore doctrina conatum
æqui bonique confule. Vale.

Dabam die 17. Januarii 1744.

F I N I S.



NOI RIFORMATORI

Dello Studio di Padova.

A Vendo veduto per la Fede di revisione, ed approvazione de P. F. Paolo Tommaso Manuelli Inquisitore del S. Ufficio di Venezia nel Libro Intitolato: *Epistola Theologico-Morales ad Illustrissimum & Reverendissimum Episcopum N.N.* non v'esser cosa alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni costumi; concediamo Licenza a *Simone Occhi Stampatore di Venezia*, che possa esser stampato, offerendo gli ordini in materia di stampe, e presentando le solite copie alle pubbliche Librerie di Venezia, edì Padova.

Data li 20. Febbraro 1743.

(*Gio: Pietro Pasqualigo Rif.*

(*Daniel Bragadin Cav. Proc. Rif.*

(

Registrato in Libro a carte 27. al num. 168.

Michel Angelo Marino Segretario.

A di 8. Febbraro 1743.

Registrata nel Magistrato Eccellentiss. degli Esecutori contro la Bestemmia.

Alvise Legrenzi Segretario.

MAG. 2007239

1. The first part of the paper
describes the general situation
of the country and the
state of the economy.
2. The second part of the paper
describes the state of the
economy and the state of the
economy.

3. The third part of the paper
describes the state of the
economy and the state of the
economy.

4. The fourth part of the paper
describes the state of the
economy and the state of the
economy.





4

2



